

乾隆歷城縣志

歷城縣志卷第十六

古蹟考三

亭館二

明

尹公亭在北門內

集志

邊貢尹亭夜集詩憶共尚書飲蘭舟漾渚風芙蓉開  
月下簫管入雲中鶴唳烟沙遠螢流水閣通重來值

搖落無復往時同

華泉集

五月七日陪李劉二侍御遊宴尹亭詩不到北湖久  
重來蓮葉青水香還落照山色自孤亭竹隱尚書榻

窗懸柱史星回舟忽已晚波上月冥冥

同上

王廷相尹亭宴集詩戒艤泛澄湖窈窕觀湖渚古柳  
蔽迴岸雕楹耀丹水尚書已邈逝亭館麗未已我來  
夏候變清覽紛可紀羣水闢菁荷列岫獻蒼紫篠風  
既洒冠花露亦淡几奉爾小蓬邱宛在水中止淝淝  
大雅吟朋僚况文史伊人昔當路衡準世所恃勲伐  
茲烟燼世華一何駛朗鑒無留形空羨山公啟形神  
竟乘化今兼豈殊理舞雩協聖符濠梁稱達士悠哉

湖上磯吾欲酌清泚

德志

賈園

邊貢賈園詩灤水橋西一畝宮小窗香度碧荷風

夫野性無拘束便欲移家向此中

華泉集

史園

見函山集

劉公花園

劉天民題劉總制城東花園詩中丞休沐在山阿倚  
杖看雲鬢欲皤回首北門猶鎖鑰寄情東圃但松蘿  
菊天常掩蕭蕭徑月夕豪吟浩浩歌為念蒼生難穩

卧須知安石奈人何

函山集

青蘿館在北渚

稽志

李攀龍青蘿館詩十畝青蘿別館開使君延眺意悠

哉風搖北渚清陰合烟雜南山黛色來臺敞高秋深  
染翰庭虛斜日淨啣杯西隣紫叟常還往帶索應同

薜荔裁

治漢集

覽亭在千佛山上

李戴記一覽亭初建佛寺前為積雨傾壞因山腰隙  
地移舊亭而新之公餘登此坐翠微中可以滌洗塵  
襟而憑檻一覽則民瘼更歷歷目前也已丑仲春對

泉子書

石刻

閩館在城中湖上城北又有聞韶臺

齊音

按舊志大明湖南又有聞韶驛

水西亭在湖上

雲波亭在湖上

環碧亭在歷下亭旁

瀛洲亭在環碧亭西

漣漪閣在湖上劉函山有詩

會仙亭在劉園許邦才有詩

以上俱見舊志

劉天民湖亭

天民新治湖亭成攜家小泛之作陶令歸纔得明湖

秋可禁松篁藏屋小荷芟曳船深家醞山妻進園蔬

穉子尋乾坤正樂集不止遂初心

函山集

錦纏莊別墅

按函山先生集先生世居錦纏溝西岸上又有別業在龍窩晚年又卜居南山弔枝菴晉江與公偕和詩亦似非一處錦纏溝見舊志集中或作壘或作蟬

王慎中同顧雍里訪劉函山郊行詩東郊芳草色一徑引征輿非為巡農務咸言訪隱居泉清新雨後山媚早烟初此意誰相會惟應君與予

遵嚴集

劉函山田莊宴集同顧雍里詩二首言駕出尋君暫因屏世氛不忘雞黍約解與麋鹿羣比舍垂青柳前

山起白雲相看同此趣無以仕農分

向晚西郊密脩然野外秋土膏含雨潤山氣帶烟流  
故道牛羊反前林鳥雀投猶言明月好其奈促鳴騶

同上

天民始下田廬述事詩懸車謝長路言旋舊田廬草  
木正敷榮禽鳥相與娛歸耕未及老堪以荷犁鋤親  
友交慰藉自媿多艱糞相遺指頰髮生理論舊畝擬  
結泉石盟同為詩酒徒天下豈不廣光景無多餘達  
人舉知命君子存故吾悠悠慕前修申章報讒夫

山

集



鄉養賢谷嗣興同宿山莊詩青罇開別墅明月滿高樓盛暑當今夜炎天有素秋烟蟬穿葉抱螢火入花流却想平生路江山漫遨遊

同上

訪弔枝山詩城市厭繁喧川原起遐想邈焉愜素遊候爾脫塵網白日理幽燈元宮靜須養遙見雲中蒼何人獨偃仰

同上

蓉泉月屋劉天氏有詩

見舊志

劉家亭小淇園北聞小淇園亦劉氏園也後歸趙氏止餘一亭今淇園廢矣而劉亭猶在

舊志

許邦才劉使君湖上亭詩公幹美才情亭臺不日成

柳陰涵竹翠荷葉兼清鏡  
看魚泉從橋掛月生  
山光城外過鳥影鏡中明  
沙溜紫琴曲花源出弄聲  
流紋牽荇帶蝶拍接鶯笙  
醉坐能醒石冥搜不夜城  
蘭舟無遠近桂楫更縱橫  
北郭誰開水斜陽正覆觥  
尚書鄰舊壘台閣締新盟  
今有詩誇古還如孟得名  
屢過殊不厭愛此濯塵纓

魏志

谷繼宗亭

金線泉在趵突泉東北乃谷進士繼宗舊亭也其蹟  
後有感詩曰可憐一曲吟詩墅棄作三年賣酒家入  
目止存君子竹傷心不見美人花池中水湧魚爭躍

樹裏風來鳥任譁此日野堂歸舊主青山坐對興無  
涯後歸陳憲副九疇登興文社屢出科甲友金見讀  
書其中顏其堂曰深柳讀書堂余嘗取曾子固詩句

更之曰冰銷堂

舊志

繼宗金線亭詩新春復至藉池亭忽見花開淚欲零  
金線斜垂天上月玉繩低度水中星丁香鳥啄穠華  
紫丙穴魚吹細浪青已被羊雲輕賭去何時爛醉倒

銀瓶

同上

蘇澹濟南谷丈卜居泉上詩海內詩名岱嶽齊卜居  
新傍浣花溪漁槎偶爾鷗盟近碁局蕭然鶴夢迷白

虎名泉幽和月聽青牛關迥抱雲棲相如莫謾逢楊

意恐惹蒲輪灤水西

蘇仲子集

通樂園在趵突泉西又名川上精舍殷文莊建

舊志

殷園石失名今園雖廢遺址猶存樹木蒼葱湖石屹  
立頗輔趵泉之勝崇正壬申有人伐木修橋石失其  
勢遂僵卧蔬畦中矣方在盛時此石價重千金過之

輒為於邑

同上

按此石今移置趵突泉上

張弓正甫泉亭留別詩孤忠身退早背郭結幽亭灤  
水澄當檻函山翠作屏秋雲多變幻鴻羽自儀型時

月步集卷之二 亭第二  
六  
日留清座塵心分外慳

蔣志

于慎行過殷少保金輿山房有感詩相國名園負郭  
開朱闌寂寞鎖蒼苔泉聲故自花間出山色依然座  
上來多士尚歎懸帳日蒼生空想濟川才却憐甘載

平津客淚灑東風首重回

穀城山館集

如斯亭在川上社

蔣志

趙氏溪亭

張弓趙氏溪亭詩秋老園林感物華敗荷殘柳伴枯  
槎竹間有徑通茅屋記得當年賣酒家

蔣志

李攀龍鮑山白雪樓

王世貞李于鱗傳于鱗歸則構一樓田居西眺華不  
注東揖鮑山曰它無所溷吾目也繡衣直指郡國二  
千石干旄屏息巷左納履錯於戶奈于鱗高枕何去  
亦毋所報謝以是得簡貴聲而二三友人獨殷許過  
從靡間大司空朱公衡時巡撫伺于鱗閒迫起之為  
置酒懽甚自是諸公推轂于鱗者相踵會今上初大  
徵召者碩于鱗復用薦起浙江按察副使弁州四部稿  
王舍店東北隅為李滄溟故居身後零落頽敗舊執  
宿契無過而問焉者一樓已為富豪馬廐矣同上  
攀龍酬李東昌寫寄白雪樓圖詩并序樓在濟南郡

東三十里許鮑城前望太麓西北眺華不注諸山大  
小清河交絡其下左瞰長白平陵之野海氣所際每  
一登臨鬱為勝觀東昌李使君子朱以讀白雪樓集  
於廣川馬中丞家咄然壯之歸為圖以寄而攀龍贈  
馬如此詩名東郡沈隱侯那復擅竒顧虎頭江湖盤  
薄有能事盡我山中白雪樓推毫已驚海色至無乃  
兼驅蛟蜃遊須臾百里昏陰合咫尺疑聞清河流華  
不注山得非雨平陵以西胡獨秋松風似欲卷綃起  
良久看雲失去留丹青快意癡如此丘壑過人老即  
休使君實解郭中調為爾深知宋玉愁

白雪樓秋夜同許右史龔茂才分韻林烟既曳綃湖  
霞亦被絳雞犬靜荒村蓬蒿翳深巷燒微見月出鐘  
清識霜降各稱浮白樂未覺呼盧競更賦梁園雪如  
流華渚虹豫愁還城邑車馬紛相撞

返照入平陵白雲出西隴天清雁影澹山空嵐氣重  
三徑何蕭條高人乃接踵諸生稷下秀詞客梁園寵  
松菊有佳色琴樽亦慙懣但醉不須眠寒燈坐相擁  
白雪樓詩伏枕空林積雨開旋因起色一登臺大清  
河抱孤城轉長白山邀返照迴無那嵇生成懶慢可  
知陶令賦歸來何人定解浮雲意片影飄搖落酒杯



九日登樓詩白雁黃花處處秋鮑山風雨獨登樓忽  
驚返照湖中出轉見孤城水上浮多病恰堪成卧隱  
濁醪正足抵窮愁先生懶作東籬會可但交情老自  
休

夏日襲生過鮑山山樓詩長白山人本種田談經半  
住鵲湖邊攜來滿甕春城酒乞得諸生月俸錢倚檻  
四高滄海氣銜杯一望縉雲天尋常雞黍休嫌薄不  
淺交情二十年

秋日許郭殷見枉鮑山山莊詩玉壺春酒石榴殷此  
日中林見往還惟是樽前幾知己那能不愛叔牙山

以上俱  
滄溟集

王世貞寄題李于鱗白雪樓詩平楚蒼然萬木齊  
嗟我飛閣岱雲低峯頭玉蕊春長在檻外金莖夜不迷  
賦就梁園無左席書來郢曲有新題何人強責元龍  
禮不遣清尊吾輩攜

弁州四  
柳稿

王世懋寄題白雪樓詩西北高樓天際看美人清夜  
自憑闌悲風忽送雙鴻起飛霰遙從萬樹殘綵筆縱  
橫搖岱色綈袍蕭瑟上春寒登高莫作江南望郢曲

於今和正難

奉常集

馮惟訥訪李于鱗幽居晨起登樓作百尺高樓際曉

攀不知身世在人寰  
雲邊黛色連滄海  
天外笳聲落  
斷山橫逸文章千古事  
沉冥邱壑幾人閒  
秋來蓬閣  
金光滿時有  
益放跨鶴還

光祿集

徐中行寄題李于鱗白雪樓詩  
寥廓誰論碣石宮  
千秋作者此樓中  
自非海嶽開天造  
安得文章有國工  
撫軫陽春迴黯淡  
揮毫寒色散鴻濛  
杜門莫怪常高

卧郢調人間未易同

古今詩剛

王象春白雪樓詩  
荒草深埋一代文  
蔡姬典盡舊羅  
裙可憐  
天半裁  
岫雪空自頽  
樓冷暮雲齊

音齊

田雯韓倉訪白雪樓遺跡詩  
直過丁香灣  
便入韓倉

谷谷口闕無人鳥聲媚幽獨雜花落長松雨晴如膏

沐

古微堂集

按白雪樓故址在王舍人莊東北隅今為曲氏塲  
圓東距韓倉村十里山疆諸公詩皆得之傳聞耳

張元韓倉道中懷李滄溟詩落日韓倉道懷賢慘客  
顏詩名猶白雪墟里但青山七子琴樽冷千秋林壑

閒惟餘幽澗水日夜送潺湲

綠筠軒集

湖上白雪樓

于鱗末年又築樓於城中湖上碧霞宮之側許殿卿

賦詩所謂湖上樓是也

齊音

于鱗先生城中書樓亦名白雪巖然一茅頽敝不堪  
五易主而不售矣余以先賢故倍直市之仍其匾額  
不忍易恨無于鱗佳句酬之

同上

得于鱗湖邊舊舍居之詩草堂畧似浣花居珍重先  
生手澤餘不比謝墩爭姓字但須更貯滿樓書

同上

張元鶴華橋弔李滄溟先生

橋東北數武即  
白雪樓舊址

詩五首

蓮子湖邊蘆荻秋鵲華橋上月如鉤西風雲水空蕭  
瑟何處詩人白雪樓

一代珠槃付黍離青山白紵夕陽遲誰知宿草寒烟  
外猶有詞人問蔡姬

雅奏鈞天曲甫終阿誰撼樹逞詞雄總然吹索煎餘

地未抵黃門論至公

陳大樽先生辨先生七律為三百年絕調

白雪聲停日又斜柘枝迓鼓競喧譁君看水火分爭

後畢竟何人是大家

後來定論皆以何李王李為大家竟陵餘分閭位不可並論

七子琴樽翰墨場風流異代付滄桑百花洲畔休回

首寥落湖山半夕陽

綠筠軒集

灤源白雪樓

白雪樓舊有二處今皆凋落士人不忍因於第一泉

畔另起傑閣要之非實

齊音

于鱗卽世子孫淪亡嶺南葉公遊宦歷下捐俸錢起

樓臺於濼源隙地如其題焉非其稽也

薛志

邊習登白雪樓懷于鱗詩濼源風景冠齊州更築詩  
豪白雪樓人擬古今雙學士天開圖畫兩瀛洲雲間  
黃鶴還飛去海上滄波欲倒流聚散存亡餘感慨轉

憐花鳥不知愁

王士正選  
仲子詩選

光盞趵突泉白雪樓詩人去樓空濟水頭欄杆倚遍  
憶風流白雲黃鶴杳何處山色溪聲共一樓長夜漫  
漫千古恨知音落落到今愁嶺南大雅關同調春鳥

嚶嚶自可求

薛志

施閨章趵突泉上白雪樓詩傍水新移白雪樓凭虛

齊色俯齊州青冥古木垂天暗日夜寒泉拂檻流詞  
客登臨還作賦岳雲繚繞故生愁鮑山東望成今古

草閣榛蕪玉露秋

慧山集

潘耒白雪樓詩百尺高眠四海空滄溟文玷夙稱雄  
生憑婁水塌箴應死耐虞山玉石攻盛世才華容傲  
睨達人官爵謝牢籠清嚴標格依稀在華鶴蒼寒落

木中

遂初堂集

李滌秋夜白雪樓有感詩明月松間出危樓獨自看  
泉聲當暮急山色入秋寒白雪先聲在青箱世業難

葛衣寥落甚沾袂淚闌干

山左詩集



李杜白雪樓懷滄溟先生詩山色明鵲華湖光漾蓮  
子白雪起高樓齊風暢宗旨七子共登壇滄溟執牛  
耳左顧扼茂秦右顧攜元美微吾其長夜沾沾時自  
喜想見敞樓窗岸情憑烏几脫稿未經旬已貴長安  
紙江河萬古流頽風挽正始竟陵爾何人騰口肆譏  
毀虞山既代興尤於公集矢聲華竟消沉沉逐流  
水俯仰百年間高樓亦再徙蔓草獨行吟懷古情何  
已

同上

宋云鈿九日過白雪樓詩何處登高去言尋白雪樓  
流光嗟荏苒勝地足淹留泉沸晴天雨山橫落日秋

歸時人盡醉明月滿汀洲

秋景  
小咏

郭園

志

許邦才郭文園亭次潘文韻詩酌突泉頭水竹居  
亭松菊更扶疎霜天談讌流連久月夜題詩眺望餘  
塵世本來皆逆旅乾坤何處不吾廬君家自有遊仙  
咏况得河陽重起予

水村許邦才莊在北門外

邦才甲戌中秋入北村別業詩長思卜築傍烟霞百  
里幽尋不憚賒譚子城東川窈窕鵲山湖北路迴斜  
水深蘆荻迷秋雁雨霽樓臺見暮鴉禪客欲因開梵

字異人相許即仙家秦時浪說桃源隱漢使虛傳蓬  
海槎空碧看雲消白日露清釀酒待黃花有時贏得  
傾心處咫尺還論天一涯

以上俱見舊志

李攀龍九日集殿帥池亭詩二首卜幽命詞客冠蓋  
至如縠白雲淡蕭萋黃花媚新醞灑翰湖上清開樽  
魚鳥近零落偃池荷淒風隔籬槿徑回片橋出林暝  
寒城隱臨流濯長纓飄然祛塵坐

寒空鵝嶺秀齊野湖水澗墟落散城隅池亭入幽豁  
雲陰出水鮮石色含霜活白鳥下烟際歸鴻起天末  
返照歎長林羣流亂相聒紫癭壯可持濁醪美堪擬

秋高吹臺興老劇文園渴佳節有獨醒吾生豈云遠

滄溟集

逼除過右史水村江山人同賦夜來北渚北風急打  
頭雪花大如笠片紙東飛右史書詰朝小作湖中集  
到門白鳥出高巢繫馬南山迸人入使君亭中未解  
醒肅客登筵一長揖地僻兼無俗子妨樽空況有隣  
家給意氣還須我輩看功名但任兒曹立瞥眼旋驚  
青歲徂沾唇莫放金杯澀世上悠悠已自諳即今不  
飲嗟何及醉聽楚調起寒雲綵筆憑陵朱絲濕平生  
多少伯牙心此日因之寄篇什

同上

鮫人館在五龍潭東下瞰深潭陰雨魚龍出沒時發光  
怪崇正庚辰知縣張鶴鳴重修舊志

王士正鮫人館詩湖上鮫人館鮫綃展素秋窺簾雙  
白鳥照水幾紅鷗北渚木葉下南山空翠流幽懷惜

清夜更艤采菱舟

蘇尾續集

于太僕池亭在龍潭西北

舊志

韓應元芙蓉亭在芙蓉池上

同上

烟雨亭在鵲華橋西孟醇所構其臨水者曰濯錦亭

同上

濯錦亭乃孟觀察賓竹所構明湖華山得雨兼者城中  
無二地也觀察年九十餘步復如飛豪飲歡話蓋

地仙矣

音齊

趙世卿小淇園在湖上內有問水亭冷香亭

志

凡宦濟南者每耽山水讌遊或至廢政小淇園烟雨  
樓水面亭千佛山排當殆無虛日曾不憶記中云年  
不順成大夫不食梁士飲酒不樂耶餓殍滿野飛蝗  
蔽天一日宴貲百人可活若或講求賑務深歎民隱  
猶可言也喧雜既罷促膝圍席嗚嗚私語不過較升  
除計恩怨已爾水主山靈其或不佑

音齊

阮以鼎小淇園詩華不注山插霄起芙蓉影落芳湖  
裏滄溟倒瀉天河水下有泉源應星紀分沙漏石長

映空披蓮繚纈紛搖風遠勢浩漭滌日月遙光噴薄  
含烟虹滙茲萬頃壯歷下何必千里誇江東河干窈  
窕結茅屋陰森蔭以萬竿竹續取渭川與管谷湖波  
竹浪影交逐一幅瀟湘使稷綠漁船葉葉點輕鳧歌  
聲款乃遙相續主人一彈水雲曲焚香手把南華讀  
方瞳綠髮神悠悠竹外松風來謾謾獨求扶輿堅白  
性此中更飽江湖興百折束之斷不回千尋直上存  
餘勁塵事紛紛宵輩橫大帑窮簷似懸磬苦心蒿目  
支九陲撐拄爬梳權利病水竹空憐幽意便藉公一  
柱長扶天為霖作楫看今日良弼誰居稷契先

圓雲館在伊人館南趙廷璽精舍

志

伊人館在三娘子灣陳文學治策書舍

白鷗閣在北門內孟醇建劉勅易今名

洪家樓城東南七里洪侍御別墅後為殷象賢書樓

霖雨亭在五龍潭上巡撫黃克纘建

一竿亭在大明湖內西偏

劉勅一竿亭詩一亭獨立水中央萬荷風來滿座香

每欲拍船人不見一溪楊柳帶斜陽

周繼逸老園在鵲華橋東

浮網亭在水雲居內邢侗題



歷城縣志 卷之二 亭館二

劉勅三瑞園在東關中有陽春館

王象春問山亭在大明湖上以上俱舊志

象春詩問山亭子拱如笠屹立湖中閱古今箕踞悲

騷王季木時敲石几激清音音齊

徙居鵲湖詩何處桃源可避秦玉函山北水之濱舟

能泛酒無妨小鳥習聞聲漸自親早沐拜酬華不注

夕陽詩弔季子鱗千秋此地應憐我回首風雲跡已

陳問山亭集

徐夜濟南雜咏齊音百首存風土和者關西文太青

異代詩人尋舊址祇應重築問山亭季木公住濟南時若齊音百首

徐詩

水雲亭在布政司西北

志

松亭在王文學瑞園內

志

遂香亭在南關

同上

國朝

歷下亭

李興祖重葺古歷亭碑記畧歷下亭故在大明湖之  
濱李滄溟曾一修葺至今又百五十年復為荒墟前  
人讌賞遺蹤不可想見余承乏斯地因謀之藩臬諸  
公重新焉其地為故紳艾君遺產聞斯舉遂捐以助

於是徵工庀材甃石安基相方考楹面南而中周廻  
凡六楹東西護以廊廡左監緯楔右置閒房後列石  
刻李杜詩廊內繚垣嵌今諸名什顏曰古歷亭旁架  
木梁通游履始於二月上浣成於三月中浣彌望極  
顧萬山面內烟叢月棹來徃波間雨檻雪窗參差湖  
面誠游觀之佳麗者已

歷亭詩  
文會編

余嘗疑宋元歷下亭非唐之舊今亭則並非宋元  
之舊迨讀此碑則並非明之舊蓋所謂故在湖濱  
者乃宋元以來亭址也祀園謂有洲渚孤峙中央  
乃歷下亭舊址猶仍向來之訛辨詳見前

李興祖蔚藍軒記畧境有曠而愈幽虛而甚邃者野  
徑荒陂一經覽勝者經營遂若於寥廓之中獲其與  
行空茫之際得其靜深而山川之靈秀若不肯終沒  
於冷烟衰草間也癸酉夏葺古歷亭工竣更壘石築  
土於亭之西偏為軒宇三間顏曰蔚藍取湖色天光  
相染之義而幽者邃者適以增其虛曠之致則斯軒

又以補亭之所不足也

歷亭詩  
文會編

水鏡亭記畧坐亭之西有隙地如盤修可十武廣亦  
如之四周皆清波環繞可鑒鬚眉為浮梁以渡作小  
亭於上曰水鏡每當烟霞澄鮮月波相盪若身游鏡

中纖悉皆見雖鮫室晶宮不是過也

同上

朱彝尊題歷下亭康熙庚戌五月既望泛舟蓮子湖  
眺北極臺時藹藹始舒熱風未甚循湖而行求七橋  
故址俄而雨驟至復乘舟登歷下亭與客縱飲既霽  
泉泠泠注亭下有魚自濺泳躍入階除童子烹以侑

酒蓋客濟南二年矣乃得一醉茲亭焉

暇書亭集

王士正汎明湖登水面歷下諸亭詩已訪濼源堂更  
汎明湖水十年始一到白髮照清泚鳧鷗喜我來拍  
拍沙際起遙見蘆之漪已有扁舟艤楊柳何蕭蕭葭  
莢亦靡靡太息漢南樹憔悴今如此舟行明鏡中烏

呀屏風裏昔賢觴詠處餘韻留蘭蕙濟南名士多青  
眼望吾子日暮銅斗歌斷續忽盈耳懷哉坡老言烟  
波洗紈綺

蠶尾續集

歷下亭詩我聞杜老詩海右此亭古十頃玻璃風鵲

華亂烟雨

同上

趙執信重建歷下亭詩臺觀遺墟已盡荒新亭重觀  
鵲湖旁千年水木還明瑟一半人家隔淼茫棹轉南  
山蒼翠入杯臨北渚芰荷香題詩空憶曾遊處竹裏

行厨未許嘗

歷下亭詩文會編

蒲松齡詩大明湖上一徘徊兩岸垂楊蔭綠苔大雅

不隨芳草沒新亭仍傍碧流開  
雨餘水漲雙堤遠風起荷香四面來  
遙羨當年賢太守少陵嘉宴得追陪

同上

宋云鈿聞彭眉山遊歷下亭詩以問之問子湖干景  
若何荷開曾否徧清波風生水面香應遠露下珠光  
葉想多幾處綠楊牽畫舫誰家紅粉采蓮歌樽傾歷  
下亭邊路石上新詩得記麼

秋巖  
小味

張篤慶和高仲沼古歷亭晚眺詩黃壚重引碧油筒  
紅柏橋頭萬木紅畫檻烟消秋色裏酒旗人在水聲  
中南山排闥千峯翠北極迴波十里風自昔名都誇

壯麗煩君彩筆賦文通

昆崙山房集

盛楓遊歷下亭詩我生本無涯世路隨泛梗身如孤  
征鴻空外逗寒影却辭泰山麓更淹三齊境天霜摧  
落木稍悟風日冷暫客居無定倦遊跡自屏陸子山  
陰彥一騎辱枉省相攜向城闕澄湖面西嶺孤亭水  
勢寬迴顧失萬井昔賢既已遠吾道非風秉憂時安  
稅駕汲古乏修綆殘碑雖剝落往事猶炳炳情深迹  
可鑒目寓心亦領人呼鳥聲應日晚林逾靜隔雲覓  
歸渡新月已耿耿終吟少陵句繁辭何敢騁

翰集

王天慶歷城李明府鼎望邀諸同僚宴集歷下亭詩



歡遊逢勝地，瀟灑對明湖。  
剝邑情偏暇，閒官性最迂。  
濃陰千嶂合，環碧一亭孤。  
數頃荷花候，無勞折簡呼。

晚香  
堂集

張庚歷下亭懷古詩名士重高會，賦詩傳其正。逝水不復返，遺迹常若新。緬維宴樂意，惻惻愴我神。罍爵莫醇酎，簞簋薦嘉珍。清風過洲渚，泛座荷香均。摠情合肝膈，高談轉紛綸。蕭管厭落日，惜別罇再巡。折芳

澗虛意，持以謝嘉賓。

強恕齋詩鈔

水面亭在湖上

按此亭亦非元李洄之天心水面亭，詳見前。

王士正秋柳詩序昔江南王子感落葉以興悲金城  
司馬攀長條而隕涕僕本恨人性多感慨寄情楊柳  
同小雅之僕夫致托悲秋望湘臯之遠者偶成四什  
以示同人丁酉秋日北渚亭書

帶經  
室集

按北渚亭圯已久據先生菜根堂詩序北渚亭即  
謂水面亭詳見藝文考

施閨章水面亭與陳公朗方伯對雪

時陳遷陝  
西左藩

詩選

勝遜佳客湖亭倒酒卮  
可堪風雪路正是別離時  
冰合魚龍蟄天高鶴鶴飢  
岱雲連華嶽千里一相思

愚山

集

靈雨亭即霖雨亭故址巡撫蔣陳鋤重建

王革靈雨亭記畧御史大夫海虞蔣公鎮撫東州之七年海嶽之間五穀穰熟甲午之春作亭濟南五龍潭龍祠之旁名以靈雨蓋取衛詩靈雨旣零之義也按元于欽齊乘云水經注灤水北為蓮子湖水成淨池池上有客亭池近名五龍潭潭上五龍廟潭側有亭廢矣豈池亭遺蹟耶欽被命纂輯據該博可信今潭在灼突之泉北於注灤北有合欽蓋得之而靈雨之亭公適作於潭側左右楸梧水木明瑟於鄆道元之所注曾無小異夫淨池客亭不知始於何時潭

側之亭欽時已廢而自道元至今千有餘年自欽至今日亦三四百年而初無能續容亭之有於潭側者公以大雩百源作亭志瑞而適於淨池之上非偶然也康熙五十有五年秋七月甲子記

蓼谷集

黃震青過靈雨亭詩漪園水西路遙聽老龍吟古殿含秋雨靈風結暮陰澄泓千尺水清越九臯音憑檻觀魚樂悠然濛上心

龍標

我憶閣在靈雨亭旁

王府池新亭巡撫李樹德建

按濯纓湖俗名王府池明德蒲白雲亭在其上

朱懷樸王府池新亭詩  
灤源富流水綠淨  
瓜瓞東北負華鵲參錯復渺茫  
久厭市闌喧壺觴  
慕杜塘咫尺得佳境  
眉宇忽飛揚  
亭枕撈蝦渚橫橋跨滄浪  
雕闌作亞字百步築迴廊  
小舫似越舫蓑笠思吳鄉  
坐可漱鳴玉千頭數鯉魴  
風中萬楊柳搖曳弄晴光  
眠鷗翹鷺處白蘋紅菴香  
馨折無不妙恍入輞川莊  
珠泉阿一派雲物各低昂  
日暮水關閉誰挾風雅航  
更宜招髡飲月明天蒼涼

西登山房詩

大竹林在古歷亭西萬竿參天拂雲蔽日

見盧畫齋明湖圖說

北渚亭在明湖西北

同上

按此亭非宋之舊辨詳見前

鍾性樸栢園在趵突泉東北金線泉上

李煥章曰公移病歸至濟上開栢園日讀經史百家

言時更乘興登華不注揮毫頃刻得詩累尺幅

鍾憲副公

家傳

曹溶曰鍾子筮仕濟南愛其風土遷官之日即買宅

鵲山旁聚子姓居之沒葬其處其有德於民何如也

忌者不察詆為非宜形之白簡然則官與民必漫不

休感無顧戀意會稽買臣桐鄉朱邑將見斥於君子

與

同上

王士正過鍾文子師栢園溉竹園詩梁園修竹久凋  
零金粉蕭條草自青惟有白頭王孝逸昔遊如夢記

汾亭

魏元  
續集

朱細題鍾文子先生傳後詩風雅先生志今人媿不  
如鄭瑤惟載石羊續屨懸魚吏隱三椽屋家傳兩麓  
書栢園秋柳下俯仰一欹歔

楓香  
集

王氏園

王革王氏南園記王氏南園者明殷相國士儋之通  
樂園也在的突泉西即齊乘所載之萬竹園望水登  
州二泉在其內後歸姚秀才墾為菜圃未幾轉鬻於

王氏垂三十年矣王氏無子祇一老孀婦賴是園以活余年十九移家園側距今十五年而老孀婦於今年春忽鬻於邢上舍猶言王氏南園者從子之始知是園名之也常園之屬相國也相傳相國構川上精舍集生徒講學論文服其教者咸得第去至其齋閣之靚深烟水之蒼茫泉石竹樹幽遐瑰詭之觀已無復能言之者矣其屬秀才則日率老圃從事畚鍤無所傳說其屬王氏光景風物之在三十年前者余亦不及知而自余移家以來此十五年中昔人所謂望山聽泉四時之景無不可愛者已併歷之矣不知是



園之光景風物其在三十年前與在秀才相國之時  
視此當何如也今一旦而歸上舍夫是園之在相國  
以前者歲久滅沒無從知其誰氏即齊乘之云萬竹  
亦第因二泉而知其在元有光名耳而自相國之後  
不百餘年而是園頽四易主上舍得之其亦感人事  
之無常物理之莫測廓而新之以上繼相國不然而  
溝塍桔槔以無失王氏之舊皆無不可而余今年三  
十有四每念移家於此已十五年其所成就無加於  
昔聽彼舍之泉聲對鄰園之樹色方重自媿而園又  
易主則夫十五年間天下事之興廢變遷數易其主

者不獨王氏南園也而人生歲月不堪把玩即余移  
家園側之初其時亦何可再得乎於殘余之有感於  
是園者多矣因書之以為記壬申四月二十三日

集

谷

### 白鶴亭

按城北故有白鶴書院亭或因此而名邑人崔某  
園也至今人呼崔家亭子後歸張望張復售之德  
州羅以書易名北渚園中有見山亭小華不注得  
月廊曲磴來雁閣竹徑倚華書屋沚亭涵青樓衆  
香臺諸勝

田渥城北村行過崔氏亭子詩尋幽一步一相招穿  
去踈籬僅及腰風弄輕涼披蝶粉泉流清淺見魚苗  
靜聽禽語深分柳細嚼荷香緩過橋誰構新亭臨水  
畔教人留坐酒行歌

枕湖書  
堂詩

張元北渚園雜咏五首金輿一峯秀相去四三里誰  
割一片來下浸雲根水

小華不注

踏閣見歸鴻嘹唳遠天際何處是衡陽年年自來去  
來歷問

曲徑綠清流彎環見脩竹幽人時往來相與入寒綠  
竹徑

結宇烟水間愛近華山足時復展書讀雲光滿林樾  
倚華書屋

平湖倒遠山危樓出木杪憑襟一騁望天水空浩浩

涵青樓

綠筠軒集

沈廷芳北渚園雜咏四首多年植秣菴叢叢闕石路  
颯然風雨過疑在渭濱住

竹徑

山脚蒼龍勢偃息收之而化為一磐石鱗甲碧鮮滋  
龍蟠石

娟娟透雲月杳杳映書廊向夕每如畫幽人飲清光  
得月榭



沈世焯北渚園雜咏四首  
盛廊何宜  
窈窕樹影多  
參差

鐵笛乍入破清光  
夜半時

得几麻

小樓延衆峯  
遙睇勝登陟  
日暮雲烟深  
一簾蒼翠色

湛青樓

山小體獨全  
不異蓮趺覆  
相對日夕佳  
露骨晚逾秀

小華不注

茅屋在山下  
清泉在山陬  
淙淙響玉佩  
我來枕清流

聽玉山房

沈樓集

王革赤霞山莊別墅

革秋居赤霞山莊  
感詠柴門寂寂  
夕陽橫滿地  
蓼花

野水明黃葉下時牛背晚青山缺處酒人行因循兩  
舍身將隱料理丁年志未成搔首西風終渡落不知  
何日始躬耕一十四泉  
草堂集

漪園在西門外邑人張秀園也土人皆呼張家園  
王士正遊漪園記濟南發地皆泉而其奇尤在城西  
溫泉者七十二泉之一也出自西門行闌間間不百  
步折而北有清流貫乎通遠匯為方塘居人之汲者  
浣者咸集焉稍折而東是為漪園跨水為亭為堂為  
樓閣為長廊皆因水為勝然始入門不知其為水也  
門北向甃石為路路盡復為門兩垂柳夾之婀娜可

愛有堂亦北向。顏曰漱玉堂之後為池。白石為欄檻。水清碧可鑑。毛髮下視。石子縱橫如樗蒲。中多龜魚。金鯽被水。大有徑尺者。游泳萍藻間。見人殊不畏。池上有楊柳。合抱長條。下垂披拂。與萍藻相亂。陰可一畝許。炎景却避涼風。洒然遊者。徙倚不能去。池之東循廊而南。為清皓之閣。級石而上。南山如畫屏。紫青繚碧。爭效於欄楯之下。下俯清流。曲折而東。滌源之水自南下。會之同入於西城之壕。北流以會明湖之水。閣上或書唐人詩。一聯云。泉聲到池盡。山色上樓多。風景宛然。石磴北下。復長廊。廊西即大溪閣。跨溪



卷之二 詩二

水登閣者不知水至是乃知之則閣如海市蜃樓矣

廊北皆巨竹柳盡有亭顏曰雲根雪瀑亭前有梧桐

數株可蔭可憩西出得二垂柳與來徑合游之日乙

酉四月初六日游之侶鍾輅聖與朱細子青弟士驪

幔亭子孫兆鄰以山色上樓多為韻人賦五言帶經堂集

聖與子青邀遊漪園詩齊州富流水碧玉爭游潑温

泉倚西郭後笠時追攀入門見方塘石子擣蒲斑垂

楊下婀娜幽禽上綿鬢文魚映碧藻得意濠濮間飛

閣跨靈溪坐見城南山微雨作膏沐露此千鬢髮灤

水從南來繞城甬珮環足踏青瑤流目注白銀灣咫尺

尺凌方壺冷然御風還

續集

朱紉初夏侍漁洋先生遊張氏漪園即席分賦以山  
色上樓多為韻得上字吾師賦遂初東山托遐尚高  
懷副冰雪齊物一得喪茅堂留軒車喜得侍復杖屐  
作瀟灑遊西郭青苔巷恰直微雨歇空綠一庭颺門  
生昇籃輿徑熟作導嚮到門苑柳陰幽境闌疎曠軒  
窗足空明水石互搖漾新筍階穿籜解葉未放尋  
級登層樓襟抱更一暢青峭華鵲峯芙蓉落天上嵐  
氣聚作雲挾雨勢猶壯天光忽破碎殘霞抹淺絳虧  
蔽不一形明滅各殊狀輕風衣帶斜凭闌發高唱先

生展吟毫蠶牋陳十樣醉墨傾淋漓韻語喜跌宕風  
流洛社英千載足相況定知好事人圖畫作屏障

書生

詩

傅王露詩出郭探泉脉轉踰清澗當樓衆山響入  
門秋氣深亭館雜涼燠泉聲無古今忽動濠濮興觸  
撥江湖心想見雲錦地宛對香雪林空廓人語散  
籓含風吟

季重華詩名園瀉溫谷僻在西城陰笑羨鱗鱗冰趣  
含江海深頽波渙已久餘韻分自今薜荔斷塵日蒼  
營生道心詩仙悵迴駕延客重入林幽夢落香國冷

然共會吟

田同之詩郭外漪園好林亭晚更幽花迎半規月柳  
陰一泓油白墮尊中酒青燈竹裏樓依依共今夕珍

重碧山秋

以上俱  
石刻

馮灤詩二首自作齊州客城西十五年隣家有喬木  
小閣抱流泉北郭檻中盡南山城上懸頻過因看竹  
不問孝廉船

小徑通幽室虛窗四面開  
牆頭分竹去石隙引泉來  
水暖烟連屋花深香護苔  
朝川在何處此地亦悠哉

花嶼書  
屋詩鈔

沈世燁漪園雅集詩一徑滿松陰開門落葉深西風  
老籬菊秋水淡塵心薄醉綠磯釣清狂倚閣吟平生  
耽野趣幽絕此追尋

沈棧集

### 君子泉

逴坦於賢清泉上即伊人館古蹟建書舍以旁多蓮  
竹亭名君子延四方博學之士肄業其中

逴氏宗譜

按逴園今歸德州羅氏一名賢清園

沈廷芳賢清園記畧濟南名泉甲天下舊傳七十有  
二稽諸乘志暨士夫老民殆不止是蓋舊者九十新  
者五十有五皆濟瀆之射地而出者其著者為趵突

為珍珠而賢清寶具二泉之體而微焉者也泉本名懸清一名今名瀉而為三娘子灣流經于家橋入大清河德州羅氏為園其上園可十畝餘綠以周垣蔭以嘉木其南一池方可三尋源如貫珠滴滴不息澄澈逾鏡淨不可唾東西鑿溝西從垣出穿柳根根浸久皆紅色清藻相映殊可愛東溝注而北穿籬道二十步許又稍北自地中行迸石竇間竇拱大水瀆尺餘與趵突三竇等第趵突用錫筒束以出茲自石溢天工人為不較然毀竇洩為北池視南池淺而廣其半馬菱葉荷花輕儵白沙致亦佳池西南有溝差小

於南池者南池陽屋主楹額曰賢清草堂東西俱簾  
北池北屋如之屋左設石几可飲可弈其花木有黃  
梅花桃杏李合歡紫薇海棠雜以修竹蒲桃而栝柏  
數本高柳十章青入天半俱數百年物它壤屑不復  
記乾隆十有三年夏余使濟南暇日過此羅生淵碧  
觴余及日時三伏灑然忘暑惟聞禽聲與泉聲相和  
不知旅遊之倦尋步至巷南張氏漪園園締構若勝  
賢清而堂榭週遮幾無隙土則余不能無微議焉將  
歸淵碧索記余重其請而其高祖欽瞻公以名進士  
為正御史父蘭齋負外世其家淵碧與兄素文從余

遊皆束脩向學將趾媿前人者為考濟南泉源之盛  
而記其園之概如此

隱拙齋集

劉伍寬遠園詩繞園依舊水泠泠五十年中君子亭  
不忘烏巾年正少窓前竹下注魚經

海右堂集

張元賢清園雜咏呈羅蘭齋比部四首古木千章合  
名泉一鑑開炎天不受暑清晝劇聞雷隔院分流去  
連山倒影來渾疑濛濛上蕭爽出塵埃

風竹雜泉聲斜陽林外橫偶來池上酌坐待晚涼生  
螢拂花光亂蟬鳴露氣清舉杯見明月流影過高城  
盡日泉聲裏泠然清道心殘霞分遠眺流水和孤吟



霧薄烟橫浦雲開月滿林人家菽港外遙夜更聞砧  
勝與華泉並名將白雪分雲林抱烟水今日盡歸君  
泥飲還中聖稱詩更策勲風流前輩在應共挹清芬

綠筠軒集

田同之歷下雜詩名士伊人元祐間爭開樽酒對滄  
溪當時亭館眇何處水月空傳娘子灣

名士軒伊人館相傳在三

娘子 硯思 亭上 珠

歷城縣志卷第十七

古蹟考四

陵墓

古墓葬為田松柏推為新此勢所必至也故採樵之禁  
自昔嚴之縣之陵墓太甲冢為最古見後漢書志閔子  
墓乃始見於宋朱雲班超則皆不葬於此今辨之而仍  
存之者恐其傳聞或有據也表誌諸文多畚廢壞而得  
之更閱數百年其存亡不可知矣具載之以備故實

商

太甲陵

皇覽太甲有家在歷山上

見漢書

按舊志與漢書不同詳見山水考

周

鮑叔牙墓

城冢記云縣東三十里有鮑山山下有城鮑叔牙食

邑也相傳叔牙與管仲分金於此鮑叔墓在焉

天下名勝

志

田雯拜叔牙墓詩窈窕松路深迢遞成孤往雨濕烏

角巾花沾紅藤杖遺跡不可尋但聽樵唱響

古歡堂集

閔子子齋墓

閔子墓濟南府城東門外五里又濰州昌邑西北子

壽阜上古亦有廟濮州范縣又云有墓未詳

齊

石柳傳者謂在華山前黃郡守濬河掘出閔子石棺

盛其首移之高原今華山下石柳尚存

齊志

田雯拜閔子墓詩蒹葭花未吐菱荷葉已香日夕下

山椒歸鴉亂翅翔石椁在溪側無風響白楊

古歌  
堂集

漢

鄒食其墓在郡城西天懸寨之左

齊

按陸通志鄒生墓在章邱縣北臨濟鎮西

王伯墓

元帝初元四年皇后曾祖父濟南東平陵王伯墓門

梓柱平生枝葉上出屋

孟康曰王伯莽之祖師古曰莽高祖父故下云高祖考莽

讀曰莽

後王莽篡位自說之曰初元四年莽生之歲

也當漢九世火德之危而有此祥興於高祖考之門

門為開通梓猶子也言王氏當有賢子開通祖統起

於柱石大臣之位受命而王之符也

漢書五行志

時上無繼嗣政由王氏出災異浸甚向上封事極諫

曰孝昭帝時冠石立於泰山仆柳起於上林而孝宣

帝即位今王氏先祖墳墓在濟南者其梓柱生枝葉

扶疎上出屋根垂地中雖立石起柳無以過此之明

也漢書劉向傳

朱雲墓古平陵南魏志

按漢書朱雲魯人徙平陵從博士白子友學易自工

書折檻後不復仕卒葬平陵東郭觀此當是扶風郡

之平陵也舊志載東平陵下又云墓上生草如劍名

指佞草佞人過之草必搖動姑仍之岳通志

夏侯勝墓古平陵東門外魏志

勝東平人官長信少府岳通志

班超墓在府城西三里陸通志

班超冢寰宇記云在長清東北二十五里定遠扶風

平陵人以和帝永元十四年八月徵還洛陽九月卒

齊地曷為有墓豈以齊有東平陵而附會之耶

齊乘

按後漢書班超傳超卒年七十一朝廷愍惜使者  
弔祭贈賙甚厚無葬於濟南之文齊乘辨之良允  
陸通志云在城西南三里殆襲襲字記而更誤矣

### 劉衡墓

漢趙相劉衡碑君諱衡字元宰濟南東平陵人也厥  
先尚矣聖漢龍興

下闕

王爰啟奠土遷於岱陰自康

侯以來弈世本承君允

闕

頌之純

下闕

之運時

放依

下闕

相王

闕二字

其東孚藻發於成就慕周行

而彌長大

闕二字

竝之

闕二字

蹈

闕二字

之則不

闕

師訓之范而踐四教人道所謂義方

闕二字

所謂言

忠信不師而自

闕

者也是

雄雉協服莫不歸稱仕

下闕

侯

下闕

于勃海王帝之冢弟不遵憲典君以

特選為郎中令彈枉

闕

厯匡弼

闕二字

以兄琅邪

相亡即日輕舉州察茂材

闕

除修令遷張掖屬國都

尉以病徵拜議郎

闕

遼東屬國都尉不

闕

拜趙相左

位三

下闕

左疾

闕二字

行

闕

議郎

闕二字

連徵不就

君之始任為吏師仍綏京

闕

興惠訓

下闕

陟功西尉

渠搜荒服來王後遷於趙叙民種德威懷

闕

立清



陵墓

闕二字 巨闕二字 直闕 俗惡容悅之密 承闕 靈以

闕二字 宜錫闕 福三壽佳朋旻窮不弔 闕二字 疾年

五十有三以中平四 闕 二月戊午碎其四月已酉葬

梁木比墮閔嗣多派 下闕 所自律 闕 栞勒 闕 二字 詒

聲伐於後昆其辭曰於穆我君邦家之 闕 正己師義

求福不回 闕 言以道遠 闕 先幾 闕 二字 有疾百侯僉

咨舍德何取將 闕 名 闕 如何弗 闕 三字 六亡天方 闕

靡 闕 胃降 闕 歿而名垂善 闕 令終休烈孔 闕 永 闕 二

字 風爰勒金石千載遺芳 洪通 隸釋

衡墓與碑在今齊州歷城縣界中古平陵城傍余嘗

親至墓下觀此碑因模得之墓前有石獸制作甚工

云金石錄

吳子蘭墓城南完備山

舊志

隋

鈇珍墓

濟南行記王舍人莊道旁一石刻云隋開皇丙午十

二月鈇珍墓誌巴郡武昌人學通三家優游田里以

壽卒

遼山集

唐恭墓在龍山東南

近土人掘地得一碑旋掩之畧云大隋齊州刺史唐

公諱恭之墓又云公嘗三刺齊州精琴理多惠政葬之地曰襄城之南葬之歲開皇二年也

碑據

宋

張揆墓在城南

據樂城集

蘇軾張文裕挽詞高才本出朝廷石能事方推德業  
餘每見便聞曹植句至今傳寶魏華書濟南名士新  
凋喪劍外生祠已潔除欲寄西風兩行淚依然喬木

鄭公盛

蘇文忠公集

蘇轍張文裕侍郎挽詞持節西南二十年華堂遺像  
已蒼然歸來侍從三朝舊老去雍容平地仙落筆縱

橫題壁處誦詩清壯舉杯前東遊邂逅迎歸旄浹落

城南下馬阡

樂城集

范純仁張栻龍圖挽詞三首宣力三朝藉於身五福  
全家風良將後經術古人前丁令終辭世留侯定得

仙貽謀有賢嗣素業盡能傳

范忠宣集

江邊承訃日羈宦正摧頽早獲登龍便慙無附驥才  
寄詩招悸魄引水活枯腮白首知難報長言致一哀  
二紀金華侍從臣昇平看足作閒人身躋顯仕由稽  
古世有陰功為庇民但見朝廷方貴老那知河嶽遽  
收神哀榮終始公無憾况有清名服搢紳

同上

魏花墓城西魏花莊舊志

陵墓

關勝墓在城南渴馬崖西音齊

王象春關勝墓詩關公熱血灑西原虜馬長驅入郡

門安得重鞭劉豫骨一文同祭鄂王魂音齊

按關勝為劉豫守將豫殺之而降金見於宋金二

史劉豫傳則勝之墓宜在縣境而王季木謂其善

用大刀不知何據考周公謹癸辛雜識續集載龔

聖與宋江三十六人贊內有大刀關勝其或因此

而傳會耶齊音又云金人縛勝於西郊百計說之

不降且自啖其睛示不為用皆不知其言之所從

來也若岳通志謂勝與魏花皆守濟南劉豫殺之  
按花從狄武襄南征安得復及見劉豫哉又不待  
辨而知其妄矣

元

張榮墓城東張陵坵學士張起巖碑銘

舊志

段直墓城東何二莊

同上

郭太師墓城東老僧口有元太師郭公墓碑

同上

張仁墓在唐王道口

據碑

李吉張仁神道碑銘國朝馬上得天下以神武定四  
方非武臣猛士莫能守也於是搜選豪傑登庸俊彥

加之以寵澤優之以世祿以致異人並出奮志勉力  
誓死自效所以得其人者也如公者亦由是而起也  
公諱仁姓張氏其先祖棗強人也有高祖挈家蜀遷  
居濟南歷城之東唐家道口遂占歷城籍焉父諱萬  
嘗為濟南王相公帥府提控軍民配扈氏二子長曰  
仁次曰義公其長也配吳氏頓氏劉氏子四人長曰  
信次曰佺次曰進次曰巨源三女公為人慷慨資稟  
剛烈善騎射志膽堅決輩流中少見比張侯聞之丙  
申年擢為五軍都鎮撫兼總領歷城縣軍民事後南  
征江淮根逐大元帥察罕官人攻擊安豐久而不下

公於本部選驍銳者四十人乘昏晦至城下公首先  
登城奮戈大呼其餘軍衆相繼而越雉堞城中大潰  
殺死不知其數遂克城焉大元帥察罕見其勇銳以  
拔突呼之仍加賞焉乃賜銀盃其上鐫寫金字曰察  
罕那顏賜濟南張拔突去金帳子裏要飢喫休當者  
又以副帥納忽復親手賜白銀二錠以獎其功公曰  
克安豐者非吾之力乃衆人之力也遂將白銀散諸  
士卒及安豐平定還家濟南張侯知其驍勇復授公  
總領歷城縣軍民事食采四戶公以春秋高大恐事  
有關復白張侯以長男信以嗣其任張侯許之辛酉



年授信連海把軍事百夫之長至甲子年根逐先帝  
攻取鄂州遇大炮中其右股而還家遂命張佺代焉  
佺復授百夫之長守把郢州未幾經山東之亂還家  
厥後中統三年春命弟進根逐張都督相公巡防益  
都破長峪道攻謝水棚秋山東平止至元元年萬戶  
孟公駐馬沂郟舉進授以沂郟萬戶府副千人之長  
兼管四城兵馬事就領本軍炮手因病還家謂弟巨  
源曰予職汝可任之曰尊父昆弟五人四皆享賜弟  
不仕為志願樂孔聖之道遂舉房兄張儀以代其職  
公弟諱義嘗攝歷城縣事兼防備千戶配泰氏子三

人長曰俄次曰珪次曰瓊儀即義之長子也復授百夫長以才勇聞帥府薦奉勅命以百夫之長加授進義副尉壽年七十請老於帥府以其子守忠嗣任帥府聞諸朝勅命守忠繼焉復授百夫之長噫公之為人從軍行伍出征入守攻城破敵矢石不避人莫之比是以慶流後裔賞延於世子子孫孫皆得享其爵食其祿綿綿不絕皆公之功德所致也于是子信等念先人之行實無所顯明日月漸遠恐其湮沒與其弟姪輩持行狀叩首再謝請曰願子為文於石庶幾不朽以照後世吉辭不得已故論次之而為之銘曰

偉哉張公性質非常有綱有紀為國忠良其雄赳赳  
其貌堂堂孔武有力百夫之防昔在軍中拓土開疆  
縱橫淮楚夫誰敢當安豐之勢如虎如狼功效莫比  
以獲寵光威聲烈烈英氣洋洋如山之高如日之彰  
休風不泯盛德載揚父承子繼天道永昌樹之豐碑  
以刻銘章萬古千秋德音不忘

張儀墓在唐王道口

按碑

劉敏中張儀神道碑銘國家以神武平海內恤武臣  
之勞故其寵數尤渥由百夫長而上其人戰請老或  
及其子若孫皆得襲其爵如古之世祿然慶賚不論

也故人人益奮勵矢死自効由是武臣待人為尤多如公者亦其選也公諱儀姓張氏其先冀之棗強人自七世祖遷於濟南歷城之唐口鄉遂為歷城人焉由始遷之祖迄於高曾世業農以譜亡名諱不可考祖諱萬配扈氏二子曰仁曰義仁事濟南張侯領帳下事從征淮南大帥察罕愛其勇銳賜之銀盃以拔突目之義公之父也嘗攝歷城事為防備千戶以卒配秦氏子三人公其長也次珪次瓊公自弱冠以父廢為百夫長嘗遣戍沂邾至元十年天戈南向指以帥府命城正陽野壘戡然先期而城尋以六安當南

北之交要害所繫選公戍馬江南且平詔賜馬千餘  
匹置驛安慶以通江淮時公以兵守烏金驛宋故將  
有以餘黨構亂遮其所賜馬盡驅以去公帥所部追  
於驛南以死戰大殪其衆生擒數十人復其馬一無  
失者送馬至大竹園復遇寇戰走之卒致馬而還殿  
後嘗以推擇移戍於正陽於安慶於壽春於泗於滁  
所至推姦折逆以才勇聞二十六年始用帥府薦奉  
勅肯以百夫長加授進義副尉元貞元年春三月七  
日壽年七十以疾終於軍其子守忠奉其喪歸葬於  
唐口鄉之先塋禮也夫人吳氏淑婉備婦道于五人

長曰守約次守敬次守良次守忠次適與孫男女共  
七人公為人質直尚氣節勇往不顧雖甚勞終不以  
言人以为是難之凡出入兵間嘗以守忠自隨俾之閱  
武事習戰陣而守忠亦自個儻不凡故尤愛焉且老  
謂守忠曰吾自結髮從事行陣誓以一死圖尺寸之  
效以報國恩然止此耳汝可代吾事汝無愛而身以  
成吾志也遂請老於帥府以守忠嗣任帥府聞諸朝  
許之勅命且下而公逝是年冬守忠暨其兄守約輩  
持善狀泣涕再拜請曰今守忠當就職念先人行實  
無所顯明願得吾子文諸石庶托不朽敏中不可辭

為論次之而系之以銘銘曰猗歟張公惟百夫之長  
而有萬夫之雄確乎報國之忠而有能軍之容蹇蹇  
匪躬不矜其功雖名位弗及而聲烈已隆子孫蟄蟄  
七十而終賢子嗣之豈天報之未豐有元其中有崇  
其封既宅既寧繫祖考是從勒諸銘章尚可以慰其  
幽衷

秦津墓龍山西北津元東平防禦使

修志

按墓有秦氏先塋碑銘宋貞撰即津所立載津事  
甚詳附載於此

宋貞秦氏先塋碑甲寅年夏四月德州防禦使秦君

狀其世次扣門謂予言不肖不天生七歲而孤鞠於  
兄嫂僅能勝甲便在行伍間淪落異土行三十年每  
引領東望未嘗不撫膺流涕也頃賴上世餘澤承乏  
近郡期以今年八月初二日歸葬二親於歷城縣龍  
山鎮西北原先塋之次竊欲自高祖而下列為一圖  
刻諸先君墓左廢以為子孫之傳文以託遠敢百拜  
為請謹按秦氏世為濟南歷城縣人唐左武衛大將  
軍胡國公叔寶之後也經五代喪亂譜系無可考高  
祖諱崇曾祖諱昌皆謹身農桑以致溫厚祖諱德父  
諱寶能推其羨餘以佐不給當代故老猶能言之祖



母于氏母楊氏克守婦道內範甚懿君諱津天姿瓌岸自幼有膽力年十六七見天下方亂刻意騎射問里年少爭從游貞祐中金主遷汴梁河朔不守從行尚書省張公興略定濟南授歷城縣軍民提控頗見親厚丁亥手下親隨私作過犯干許相連率麾下軍走東平東平行尚書省嚴公素知君名署歷城縣令兼本軍提控隸兵馬總管趙侯完壁帳下其冬十一月從侯取彰德進攻太行山之李合寨不日而下其功為諸校先壬辰春正月以行尚書省命提步卒千人渡河攻蓋岡捷之別招老幼萬餘人牛羊馬萬數

選駐曹州其城在魯汴之交兵繼者二十年但瓦礫  
耳君躬督者勿稍構廬舍若將久闕者公過而見之  
曰可守也即以君領州事是歲冬十二月金主自統  
兵出由間道取衛州濟自黃陵岡同知蘇山潛納金  
兵以叛且謀殺君遇夜得脫求救於東平得精兵千  
餘生擒其副使李進等一十七人復保曹州金兵不  
能至衛回走歸德國兵追之闕三字以反覆為名大

肆殺掠君訴之主將主將大怒皆歸罪於君械繫而  
去置諸大名獄中時行省公方北上具言於闕二字遽  
命遣使出之君既得釋乃詣闕訟其事竟抵主將之

罪因正授曹州長官在治十六年遷德州防禦使居  
二年復還曹州刺史兼勸闕官歲餘又改德州前後  
典郡凡二十年提兵凡數千里其戰功治跡不克具  
載特叙其所以起家者蓋如此娶夫人董氏有男四  
人長曰世勻次曰世傑次曰世英次曰世顯噫昔于  
公高大其門閭令容駟馬車過王祐庭植三槐自謂  
必生三公後皆如其言若合券天之報施善人蓋亦  
明矣秦氏以名將之後蓄德不施以貽於君而君又  
以特達之才克昌厥家不失舊物存者得以華其生  
亡者得以安其歸一門寵耀照映闕三字可以為榮

矣推原其自其偶然也哉是宜為銘銘曰維秦之先  
有功於周仲有車馬始列諸侯末大必折散不可收  
堂堂胡公躍出東周一劍橫行千里不留維君是似  
罔墜箕裘孔武有力克壯厥猷允矣貂蟬生自堯  
堯兵衛森森旌旄悠悠錦衣歸來光照松楸何以致之  
有遠其流刻銘琬琰傳信千秋

碑

### 段徽墓

張泰亨段公神道碑惟人稟天地英靈之氣以生其  
才闕有闕用而已然而非待其時待其地而欲展盡  
底蘊獨立功名於當世者亦難矣哉若夫版築飯牛

躬耕者釣之士一旦蒙人之知彼人之用離疏釋澆而享膏粱剖符錫壤而受爵位功光祖宗澤流後裔者古人誠有之今以公其殆庶幾乎公諱徽字君美其先景州阜城人也遠祖避後周顯德年間河溢之患舉族遷於濟南章邱縣喻山之西因家焉大父諱欽以力農為業父諱楨字巨川嘗為濟南錄事功曹母王氏公年十五亡其母年十八父亦卒公雖闕孤卓然有自立之志幼閑刀筆書數精通吏事性廉潔謹愿鄉人皆愛之甫冠推為歷城縣掾史年未三十值金季貞祐初山東州縣悉為塞北之馬蹂踐殆盡

而濟南亦陷公時逃難於南山山谷間而僅獲免繼  
而燕城失守南狩汴梁復遣侯公闕守東平將安撫  
餘黎收復河北公亦被驅策是時盜賊充斥闕正前  
聚公憫良民被害者衆乃以方略誘致渠魁效順而  
民得稍安侯公以勞績遷公忠勇校尉充濟南章邱  
縣主簿秩滿赴河南調再闕開州濮陽縣丞未幾天  
下復擾屬天朝開剏河北惡臣屬之有濟南大行臺  
清河公素與公相善知闕之才乃辟為

有功乃授廣威將軍

公

嘗從行臺公招土近數千餘里得大小州城

十有餘處居民數十萬口皆公贊畫之力後至庚寅  
年行臺公北覲戎輅公亦從行先是有濟南鄰境一  
將與公有 亂時嘗為衆 我濟水之田為清

河公奪其田而攻擊之從力不能支心嘗憾之至是  
將訟於上前清河公亦欲與之直公因言於行臺公

秋以 結好息民 令吾民瘡痍皆蘇

之恐近心弗安訟何時已莫若姑恕之以紓民憂徐  
為後圖公許之訟乃寢既歸遂列其 民以與

之至今彼猶德之 後行臺公南伐公以父葬事未  
畢弗克就行既而有檄召公甚速公亟往之路見有

軍士逃歸者公皆撫諭使還及見行臺公行臺公曰  
吾奉命出征軍人往往路次竄歸為之奈何公曰人  
情誰不欲安緣連年行師略無暇民不勝其困加之  
歲饑衣食弗能自給以 公出 物以賞賚之

庶可安 行臺公然之乃悉出隨軍所有絹例加錫  
予軍士乃安逃者聞之往往復還及壬辰河南平師  
旋逮丙申年遂自 移治於濟南 公以為亂

甫定之後人心稔惡弗悛於是一新 號令使民  
知所畏復繕脩城池官署倉廩府庫無不完備而乃  
幹桑麻魚鹽之利以厚民財積為 餼糧之用以



備歲計而又均戶之  盛而科稅賦驗丁之多寡以  
給徭役不數年民皆安堵如故事行臺清河氏三世  
前後凡三十餘年夙夜奉公始終如一深得為政之  
體故濟南一境比他州號為最治每上計偕考課稱  
為第一公以年老告退  許開時年七十二歲丙辰  
年六月三日以病卒於家官給賻贈  儀畢具越是  
年六月五日葬於嶺山祖塋之次禮也公娶時氏生  
五男長曰祺次曰禮襲爵授歷城縣丞次曰禧未仕  
次曰裕早世次曰禎未仕五女長適賀氏早卒次適  
行臺公次子邳州行軍萬戶張邦直次適分治高苑

縣令新城張晉次適鄒平縣張尉男 次幼未適初  
公一日嘗會諸親而謂曰兵革後吾族俱安加以我  
自寒素中起身久居要職三十餘年子孫昌盛生計  
温皆我祖宗陰德之所致今枝葉分散別立塋兆  
者已久處矣恐後世歲久亂其枝派有廢祖先之祭  
祀今列序遠近尊卑宗枝畫為圖牒勒石 立於塋  
一 次凡我子孫當思遺訓春秋祭祀奉之無忽公風姿  
魁偉鬚髯秀整見之者莫不儼然 性本寬温長者  
無文史刻薄之風至於待物接人怡顏順色温温如  
也故其治民大率止貴清淨不擾而已是以隣境之

政多矜式而倣倣焉及死之日無遠近聞者莫不歎  
歔流涕其感人之深也如此蓋段氏世系出於春秋  
時魏大夫段干木之裔源流蔓衍散布天下自秦漢  
晉魏隋唐以降迄於今其開名賢偉士如段之為  
良將段秀實之為忠臣代不乏人難以概舉故略表  
而出之以示後來云爾是當系之以銘銘曰猗歟段  
公玉潔金貞一時遷跡為齊鈞衡帷幄深謨干戈奇  
績用贊厥成皆公之力外 軍士內 邦民而勞而  
治皆公之仁疏為祥風霈為膏雨民賴以生式歌且  
舞

茂德元功富貴壽考天令其終嶮山未

平遺澤未泯千秋萬年子孫其繼之

碑

張宓墓在張林坵

據碑

李國鳳張宓神道碑大元有名臣故山東宣慰使贈江浙行省叅政封濟南郡公張公卒於至正四年四月八日享壽六十有六越八年當至正十二年其子元輔以神道之石未示顯刻持公行狀墓誌論議頓首求文於國鳳鳳生也後嘗與先兄御史君拜公於府第竊聽其言論觀其丰采不敢以燕陋辭噫惟公任保定總管之時抑軍撫民之事最為特異可稱道者於天歷初明宗皇帝在北服京師空虛西軍猝至

紫荆關戍禦之卒不支而潰百十為羣入保定界肆  
剽劫邑居之民衆聚為城守計得潰卒無良者因梃  
斃之時知樞密院事也先尼帥大軍違城五里而駐  
給府同知及縣尉與居民百餘人至軍責以擅殺盡  
戮之血淋漓被道復下令屠城民詢詢思不靖公時  
以病在告即昇疾冒白刃突至帳下也先尼怒愈張  
蹠公於前詬曰女欲反乎公從容曰孰敢反耶我病  
不與知府事已久且軍士不能拒敵而潰還虐良民  
此在法所不赦民初不辨誰何倉卒誤格之至死樞  
密已刑百餘人償其死復欲屠城城中戶不下萬餘

萬一激生他變咎復誰任我寧以身代民死極密與  
勿恐民公辭直氣和也死尼默然為少沮然猶殺張  
蔡國公五子解圍而去命公諭民以不殺故民間公  
來歡聲如雷手額以更生相賀烏虜當是時西北尚  
未寧謐保定在畿甸間使無知之氓懼禍一呼則安  
危未可知也公以一言以定其幾非忠赤之至其能  
然乎此不徒為生民計蓋為國家天下計也公既不  
自伐其能世亦未有能盡知者此乃公之奇功可不  
特書而著之乎謹按公諱宓字淵仲濟南人曾大父  
詩衍以急人之難稱鄉里妣梁氏大父諱榮故金紫

光祿大夫山東行尚書省兼兵部都元帥知濟南府  
事進封濟南公致仕贈推忠宣力正義佐命功臣太  
師開府儀同三司上柱國追封濟南王諡忠襄妣宋  
氏追封濟南王夫人沈氏齊國夫人父諱邦憲故中  
順大夫淮安路總管贈宣忠秉義功臣中奉大夫河  
南江南河北等處行中書省參知政事護軍追封濟  
南郡公諡貞毅妣馬氏王氏俱封濟南郡夫人兩世  
勲烈載在國史具於家乘公幼以質子入侍武皇潛  
邸賜名蒙古台上正位宸極即授公尚沐奉御嘗燕  
瓦便殿有旨陳古聖人可法者公進曰臣家濟南帝

舜廟在焉舜聖人也因陳舜豫親數事且曰帝王之德莫大於孝上嘉納近臣識之後山東以蝗旱聞遠命公走舜廟致禱訖事而雨蝗則盡死還奏稱旨錫金織衣一襲由是有大用意仁宗卽位詔授公二品官公謙終辭一歲中詔諭省臣者四詔語有曰朕惟張霸都兒昔以五十萬衆歸我太祖世祖念其勲勞爵以上公朕及親覩其孫蒙古台事先帝久欲職以二品辭不肯受其以三品授之尋選知滕州及陞辭上曰卿猶未官耶公拜謝臣已得郡願自效遂賜海東青鷹以寵之滕有昆弟訟財者公開諭以天倫之



重民友睦如初杖豪強柄持官府為治梗者闔境肅然麥一莖秀至三四穗州人歌之治遂放諸郡入為度支監丞出知南陽府未行轉兵馬司都指揮使預討帖實赤斤帖木兒逆黨遷彰德路總管蠲民代輸逃戶三百七十戶之徵科罷民陸運水和灰之費境中舊患多盜公令村各置鼓盜發則擊鄰村相應亦擊盜驚駭無所於匿皆遁去擢山北廉訪副使改保定除逃民之賦如彰德加倍之三免省城之禍民尤德之至今調正定移平江平江俗健訟積訟牒七百餘既下車剖析累盡人皆伏其能徽政之屬財賦司

構大家佃其田而州縣一切不得有所繇役皆細民  
大為東南弊公詣浙省請罷之省臣以聞詔罷平江  
杭州集慶提舉司眾賴少蘇今天子即位之二年召  
為吏部尚書明年拜嶺北行省叅知政事皆善於其  
職未幾以病歸至正三年起為山東東西道宣慰使  
山東食鹽為民害公請復行鹽法以便民益都路增  
油稅至四千五百定羨十倍經數下令立為禁止三  
路十三州民訟久不決者公督攝之六閱月分命有  
司決絕三千一百八十四事未及引年乞致仕歸濟  
南於四年四月八日丙寅遘疾卒於正寢以五月八

日丙申葬於歷城東和山先塋公配蒙古邁禮吉正  
氏濟南路達魯花赤曲列爾之孫監十路總管濶濶  
台之女婦德母儀可為世範再受封至濟南郡夫人  
先公五年卒始合祔馬子一人即元輔也才幹嗣  
其家廢授忠顯校尉奉天元路務提領今選松江財  
賦司副提舉先娶蒙古氏彰德頑閭中丞之孫女也  
連倫氏早逝再娶劉氏乃安定故家劉侯知州仲謙  
之女性本孝慈善事上下孫男一曰樞孫女二公葬  
之三年制贈中奉大夫江浙等處行中書省叅知政  
事護軍追封濟南郡公諡宣懿公性篤於孝弟與人

交皆有終始尤喜待賓客而自奉甚儉素平居夷坦  
宏博不為崖異至其為政則廉肅明敏更不能欺其  
所設施必先興學課農為教養之本然後支分目比  
而治其餘故一守劍州四典重郡聲名常出其上兩  
賜菑沴無禱不應蓋其至誠之所致及去官民皆刻  
石以寄其思烏虜可謂豈弟君子矣鳳既最公行事  
有關國體之大者為之序仍繫以銘銘曰桓桓忠襄  
勲冠社稷帝酬其庸王此大國允矣貞毅踐履特特  
篤生宣懿實為蓋臣勿侍帷幄嘉譽日聞皇曰休哉  
秩以崇品公遜弗堪持已愈凜出知滕州布政優得

愛洽惠周瑞生東平迺丞度支迺使兵馬節費宣威  
聲震輦下相臺我我瘳民之瘡易水瀾瀾救民於死  
平江之政治劇若問撫摩愛養不專於實史哉其姦  
民樂以安入宰天官守法惟允銓度才否如尺丈引  
參政北省宣慰東藩恢我王度綏靖元元未及懸車  
遂致其仕榮歸故鄉奄云不起計聞怛悼靡間邇遐  
帝眷不渝褒贈有加始終存歿其德如一寵賁恩榮  
世莫與匹歷城之東和山崔崔勒詞貞珉昭示後來

張養浩墓城西北一十里雲莊

陸通志

始公嘗謂吾居雲莊而樂且密邇吾先世大墓吾死

必以昭穆序葬而於是乎祠焉九月丙辰公嗣子今  
秘書郎引遵治命奉柩以葬而以清河郡夫人郭氏

附

黃潘張  
公祠記

章邱縣東南十五里有養浩墓今按元史養浩其先  
章邱人後徙濟南今府城之西十里雲莊即其所居  
生既家於濟南隱於雲莊則其墓在此無疑矣有學

士張起巖神道碑

陸通  
志

按養浩有自撰先塋碑在章邱東南相公莊張萬  
墓旁詳其文義及立碑年月萬乃養浩伯祖葬章  
邱自養浩之祖已居葬於歷城矣故曰密邇吾先

世大墓也此碑乃養浩所撰歷城一支之墓碑明  
正德中其裔孫某募刻立於章邱者後人不察遂  
謂養浩墓亦在章邱誤矣

陳鳳梧張文忠公墓詩流泉千古說雲莊一束生芻  
拜墓旁雲錦池邊春意動雪香林外午陰涼衣冠遺  
澤孫曾在俎豆名祠歲月長仰止綽然亭畔路文章

事業正流芳

雲莊集  
附錄

馬丹陽墓城東六十里大水坑

墓志

趙受益墓

趙孟頫趙君謙甫墓碣趙君諱受益字謙甫初諱文

妣鄭氏考諱成妣郭氏由祖以上世居青州西流河之南蔡家里金末貞祐中考逃難來濟南卒葬歷城西南龜山之下十里河之原故遂為郡人焉君自弱冠習文法書數任事不避繁劇當官者以為能吏省部八舉居會計之職未嘗不課最性慷慨倜儻不事羈束初吳人黃清卿在俘囚中君憐其才傾囊贖之以歸使子姪輩從學待以師禮黃一旦有南歸之思君厚贖之且令送達其家爾後游宦江左數年視他人所好子女玉帛棄若涕唾唯收書數千卷而已觀斯二者可以知其為人至元癸巳四月二十六日以



疾卒於家享年五十有九娶宋氏濟南名族是歲七月十九日亦卒享年五十有七子二人伯曰元禎仲曰元溥孫男二人曰芝曰蘭元禎等以某年某月某日合葬君夫人於十里河之先塋禮也既葬元禎等介道士張君來謁余文將刻石墓左以傳不朽予聞張君言元禎勤讀書元溥為吏廉謹鄉黨皆以為善人又嘉其勤勤懇懇有不死其先君之意風俗之衰久矣二子乃能如是子何可固辭也哉嗚呼高官尊位未必皆賢卑位小官未必皆不肖若趙君者亦可謂非碌碌之士其不至於貴達則命也後之覽者以

子言為信雖數千百載當勿毀焉

松雪集

明

濟寧王墓在門牙莊

舊志

歷城王墓在紫荆山

高唐王墓在雁翅山

寧海王墓在標山下

堂邑王墓在標山下

利津王墓在紫荆山下

安陵王墓在路家莊

紀城王墓在泉瀆莊

清平王墓在紫荆山下

永平王墓在紫荆山旁

秦瑛墓在四里山下

以上俱見舊志

衛青墓在縣西北五里藥山西麓

岳通志

李賢神道碑銘余嘗觀夫太宗皇帝靖難之初豪傑之士一時雲集已而發授封爵者不數十人然有同於効勞而封爵不及於生前者必於子孫發之若衛公是已公諱青字明德姓衛氏松江華亭人胸襟倜儻有氣概尤善騎射洪武中代父炳為隊伍長十有五年以勞封薊州衛百戶從太宗皇帝靖內難以謀

勇見稱初獻計曰大名薊州諸郡地險兵強必先克之以弭後患今我軍尚少須藉民兵以壯軍威然後大事可成也上嘉納之有白金彩緞之賜尋鏖戰正定陞副千戶轉戰鄭村琪陞指揮僉事再戰白溝河陞指揮同知復於東昌當先對敵被傷還守薊州遼軍忽至圍城不退公曰彼衆我寡實難持久乃出奇兵破之被傷上聞之遣醫往視賜米鈔彩緞又率騎士往哨濟寧生擒裨將一人至谷亭又擒謀者數人遂克東河陞指揮使又於淮河肥河小河齊眉山連戰皆捷進克泗州扈驛度江克金川門特授世襲指

揮使永樂初論功行賞陞中都晉守司都指揮僉事  
有白金錦綺寶鏤之賚復調山西都司特晉宿衛六  
年命往河南陽武督運神木於北京遂掌宿衛兵八  
年隨駕口征拜輕車將軍專督糧餉師還受賞九年  
命鎮山東特授保身勅賚予甚厚十年委督官軍開  
通河道自衛輝直抵張家灣以便糧木之運十一年  
率沿海軍士以勦倭寇十三年召至京師委管神機  
營十四年復勅公率兵往勦倭寇擒獲久逃軍民傳  
良等於曹縣條奏原宥者八千餘人十八年即墨高  
密安邱諸邑妖賊勢甚猖獗公曰此烏合之衆宜急

擊之即率兵兼程而進至安邱遇賊公麾前鋒掩擊  
而以大軍承之賊遂奔竄擒其倡亂者送至京師上  
大悅以璽書勞之曰爾能運謀設策奮忠賈勇殄滅  
妖賊惟民是保雖古之名將復何加焉今特陞爾為  
山東都司都指揮使所領官軍陞賞有差宣德中委  
任益隆特領將印勅公相機所在官軍悉聽節制今  
上即位嘉念舊人晉陞左軍都督府都督僉事賜白  
金彩緞公愈感激盡心凡有益於國家利於軍民者  
知無不為在鎮二十餘年一方賴以為安正統初登  
萊旱蝗公憂形於色率官屬齋戒朝夕祈禱因而櫻

疾乃上疏以受國厚恩未能報稱為恨上聞之急遣醫往視未至二日而卒訃至上甚憐惜輟視朝一日以贈儀秘器官為營墳凡殮葬卒哭祥日俱遣官諭祭諸王百官亦各致祭公生於洪武丙辰十二月一日卒於正統丙辰六月三日享年六十有一為人天姿開爽樂行善事喜讀書手不釋卷雖武弁起家不失韋布之行性至孝事母太夫人李氏左右就養不違居喪哀毀骨立友愛兄弟敦睦親族治家有法嚴於教子尤好施予周人之急惟恐不及死之日軍民無不流涕至有圖形立祠以祀之者卜葬於濟南歷

城鵲華鄉之原夫人周氏慈順恭儉事姑盡孝相夫  
有禮督率諸子葬太夫人於松江鄉人賢之及居公  
喪哀傷成疾又十越月而卒與公合葬焉公之曾祖  
諱福祖諱貴者樂善好義隱居不仕父諱炳元末從  
戎初累立戰功今以孫顯貴推恩追封三代貴炳及  
公俱贈特進榮祿大夫左軍都督府左都督追封宣  
城伯妣皆伯夫人公配沈氏繼李氏俱為伯夫人子  
男十一人曰頤曰穎曰顛曰預曰穎曰顛曰顯曰顛  
曰順順仕濟南指揮使早卒穎授奉天朔衛宣力武  
臣特進榮祿大夫柱國宣城伯今充總兵官鎮守甘



肅女九人都指揮董善百戶楊琮都指揮谷景指揮  
鄭福許端都督張義男愷鎮撫國俊千戶王雄其婿  
也孫男十九人穎重念前人之烈受茲異數以春坊  
中允劉翔狀走書求予為神道碑銘予嘉衛氏一門  
之盛不多見也為之銘曰衛公挺生遭時方亨揚威  
奮武以建功名獻策即行受知不淺躬擐甲冑惟衝  
是珍累獲戰捷頻進官階敵愾之志牢不可排既受  
□□益效勤勞屢承重寄曾不少驕已而備倭東方  
仰賴撫安軍民遂臻康泰妖賊有作公徃捕之亂首  
既得餘黨以披璽書來嘉崇職復轉公之茂勲至是

愈顯晚膺求舊付託益隆府樞之佐復加於公及其  
令終特荷曠典子克世承大彰慶衍為善獲報影響  
是隨蘭玉之盛在理則宜我作銘焉以傳奕世歷千  
萬年永永不替

據碑

鄧福墓大佛山下

鄧隆墓

韓青墓在馬鞍山前

許彬韓公墓碑天地有大經亘萬世而不泯者忠義  
之氣是也是氣在人歷坦途則為忠義之士遇患難  
則為死節之臣存亡雖不同所以為天地大經萬世

不泯者同忠義之所存而浩然之氣為之主也若鎮國將軍山東都指揮同知韓公青者其所謂抱負忠義而浩然之氣為之主者與公世家楚全椒上世以來代有顯者洪武中大父春從高皇渡江以功累陞副千戶既歿父貴襲陞正千戶守北平時文皇在潛邸命公取懷來雄縣大戰鄭邳埧陞指揮僉事進指揮同知征大同白溝河陞指揮使再陞都指揮僉事攻奪九門進都指揮同知小河之戰死於敵公時在孩提叔友借襲指揮使尋以成立還其官公英勇過人且善騎射永樂中文皇征迤北聞公名特命率選

騎為先鋒公殺醜虜賊衆宵遁閱數日師駐天城陽  
和復命公率勅騎襲擊之賊望風奔命不暇宣德改  
元從宣廟征武定州既還賜賚有加明年甘延諸羌  
侵擾邊地命總戎征之舉公輔行公才識敏給能飭  
邊備屢號令訓練簡閱有古良將風既還陞山東都  
指揮僉事公操持清慎門無私謁暇則與賢士大夫  
講論古今及將鑑武經諸書以資聞見嘗駐節臨清  
總督江淮漕運將士不勞而事克集以故再遷今官  
正統十四年秋虜酋也先輩逆天道憑陵中國竊窺  
神器太上皇帝親御萬乘逆擊塞外為權姦所誤遂

至蒙塵賊乘勝長驅險隘如坦途今上皇帝詔凡  
邊關可通萬馬者悉以重臣守之紫荆關尤甚衆推  
公往守而以副都御史孫祥為監軍公倉卒至關關  
寬長多歧路守者素不為備虜衆猝至乘虛而入尾  
尾不絕我軍至者才十之一衆寡不敵惶惑奔潰公  
揮旗招之得勁騎百餘諭以忠義當盡死報國衆聞  
之皆泣公縱騎獨出與賊交戰於升兒灣擊賊數輩  
已而賊悉衆迎公每手劍之數被創復為流矢所中  
公屹然不動自午達申轉戰益力賊圍之數重欲招  
公降公大罵曰臊羯狗奴我輩忠義而狗汝乎乃引

乃自刎實是年十月七日也賊退之三日收公屍身  
無完膚顏面如生聞者無不灑泣風紀近臣有交章  
言公戰死可憫乞加恩典者上命陞二級以其子承  
嗣幼弱命給廩優養於家配張氏及侯氏皆賢而有  
德子一人即承嗣女六人皆適名門卒之歲距所生  
之年得壽五十有二嗚呼公承先世之美能自奮力  
振揚威武以成厥功而中罹艱危以身殉國可謂見  
危授命殺身成仁者矣然則公雖死而名常存若張  
巡守睢陽余闕守安慶忠義之氣至今在入所謂天  
地大經萬世不泯者得不與此同一轍哉前此廣東

海寇猖獗擁衆臨城主將張安既失利而裨將都指  
揮王清力戰移日身被重創矢石如雨左右皆憚不  
敢近清身憊計窮為其所執賊素畏清既以甘言推  
為上將否則必誅清罵不絕聲又置之陷車不能死  
日令人誘之清終不聽惟求一死翌日將伏誅清曰  
汝輩繫我城下呼三司官臨視使知吾死所賊如其  
言至是遂遇害古人謂慷慨殺身易從容就死難立  
名若清者可謂無忝於公不愧於古名將矣彼有倒  
戈迎降開門輸款者有苟延殘喘以圖爵賞者視二  
公所處不亦顏厚乎公死之四年鎮守皋蘭都帥李

公之子文素與公厚恒憫承嗣幼弱公之忠義不白於世憤然於懷比以公務來京乃狀其行實詣余徵銘將過歷山葬公刻石墓道以彰公之潛德後之欲知公者當於此焉求之銘曰韓為華胄淮陰派分桓桓先世克著其勲公斯承之以宏先烈西征北伐有凌秉鉞漕運於京倉庾克盈匪徐匪棘人心實寧櫬槍流芒掩暎太陽公志勤王衆寡莫當一劍捐軀浩然之氣視死如歸公之忠義惟忠與義天地大經公能全之雖死猶生歷山之原理公之骨迷行有碑過者拭目



李貴墓在捍石橋外

許彬李公神道碑銘天順五年正月二十一日鎮守  
貴州副總兵右軍都督僉事李公以疾卒於官訃聞  
上為之震悼輟視朝一日厚賻其家復為之諭祭詔  
有司治喪自貴昇櫬還山東濟南之歷城葬焉國家  
著令都督之葬法當樹碑神道其子勛介山東都帥  
狄公廷器持按察僉事王先生所狀事行來乞銘按  
狀公諱貴時顯其字也初姓苗其先本山後人入國  
朝始占籍順天府之大興縣考諱贊任邳州衛千戶  
妣于氏曾大父諱阿都赤元任國公大父諱青舊名

字維帖木兒洪武二十三年隨乃兒卜花歸附始以  
小校隸燕山左護衛改舍人左衛能自立功伐由總  
旗歷陞正副千戶累陞指揮同知時洪武三十四年  
六月也明年攻克東平汶上淝河大店小河齊眉山  
靈璧泗州逾淮渡江克金川門屢以奇功陞本衛世  
襲指揮使永樂八年隨征迤北殺敗胡寇陞山西都  
指揮僉事未任十二年再征迤北得白金表裏之賜  
又三年以疾卒庶長男黃頭甫三歲命食優給尋亦  
卒宣德三年二月公以青之姪孫來自邳州命襲其  
職是年九月前哨會州與賊交鋒以功得賜白金楮

幣命隸三千營寵異之也是年詔以都指揮子孫俱令注缺管事故公得注授山東平山衛指揮使正統三年選率馬兵官軍番直赴操京師管五軍之右哨九年隨昭遠伯迤北征進當先突入賊陣以奇功陞山東都指揮僉事仍操備右哨尋推選協贊總戎景泰五年二月辰貴之間苗蠻猖獗詔舉名將充副總兵往鎮其地公實授命以行時以公姓苗與苗相嫌故賜今姓六月平越黎從羊保麾下賊首阿孛楷稱王號煽惑苗衆流毒道路公率勁騎直搗賊巢賊勢平奏授陞署都督僉事天順元年正月皇上復正

大位差禮官秦嗣費勅賜以白金綵緞是年十月實  
授都督僉事二年六月勅與南和侯方瑛合兵征東  
苗公尅期而至攻克益賽克柔江利翁受河盤龍夏  
戎琵琶楊安口種苗計一千二百餘寨箐洞生擒渠  
魁王刺冬等班師回鎮是歲賊首王阿榜復於翁金  
山硬寨烏合苗衆肆為劫掠四年正月再調兵平伐  
分進擺芒攻克翁受已巴令橋谷龍奇翁岡山背翁  
金山硬寨悉平三月班師是年七月西堡犴獠蠻賊  
為患十一日進兵老虎關攻破師子孔伐乍山硬寨  
奏捷於朝時公以累歷戰陣勞瘁困憊乞歸養病濟

南上賜俞允未就道而卒實天順五年正月二十一日也距所生之年得壽五十有六葬之日乃卒之年八月十一日也娶許氏先卒繼劉氏俱封夫人側室劉氏馬氏子四人長勛娶何氏次勉次勤勸女四長適臨清衛指揮王綱次適膺襲陳富吳江劉金鳴乎公為人端重謹厚言動不妄為將知勇兼備帥師所過紀律嚴明秋毫無所犯而士卒歸心故所向成功而得褒嘉之命錫賚之榮者以此也嗚乎公祇事朝廷涉歷山川久用志篤故能建功國家流光史冊致身貴高以垂名不朽豈非古名將之流而今之不可

多見者與銘曰明聖之興有命自天必有輔翼名世之賢桓桓李公勇蓋萬夫疇克當之拉朽摧枯辰貴之間苗蠶僭偽公往平之殲厥醜類帝嘉公能股肱心膂東蕩西除兵民安堵公於事上誠一不二知竭臣職鞠躬盡瘁公於馭衆有紀有綱撫如春和令如秋霜沒有榮恩賻贈祭奠公之冥靈服茲寵眷歷山之原松柏蒼蒼勒石銘功永矢弗忘

以上俱據碑文

王允墓城西五里

舊志

尹旻墓在八里山陽

同上

李東陽尹公墓誌銘吏部尚書尹公既致仕十有八

年卒於家上聞訃嗟悼遣官諭祭勅有司治葬事仍  
贈特進太保謚恭簡賜之誥命褒舊績也公姓尹氏  
諱旻字同仁世為歷城宦族公七歲知讀書稍長下  
筆數百言正統丁卯舉鄉貢第一連擢戊辰進士簡  
入翰林為庶吉士己巳授刑科給事中景泰間值國  
多事屢有建白皆傅正義天順丁丑遷左給事中英  
廟見其儀觀魁偉音吐洪暢欲大用之尋擢通政司  
右叅議轉左叅議己卯早代祀海岱禮成而雨庚辰  
持節封安南國王盡却餽遺國入斂服辛巳王師有  
事於陝西公出總軍餉有白金綵幣之賜壬午丁母

艱癸未驛召至京師擢吏部右侍郎成化己丑遷左  
侍郎歷王李姚崔四尚書皆曰代此位者必公也壬  
辰漕河壅滯公往督官運事遂集癸巳勅拜尚書命  
侍經筵戊戌加太子少保賜玉帶麒麟服己亥加太  
子太保累進階至光祿大夫勲柱國甲辰加太子太  
傅公久掌銜鑑博采公議不為私撓天下翕然稱之  
有姦吏李孜省者貴幸用事憾公甚搆成大獄再削  
職以尚書歸公不自辨列州引咎自責而已今上御  
極孜省既伏法乃吐實於官諸黨惡者罷黜殆盡而  
公壽考終命竟膺褒卹非獨復其故物而恩禮有加



焉然則世之以仇怨相傾擠竭計盡勢而不為後地者亦何益哉公素負學識善斷大事尤精鑒強記每經銓注雖稠人小吏閱數年猶識其名時料人壽夭成敗歷歷多竒中故其退也大夫士屢疏薦欲起之而公亦老矣惜哉公生永樂壬寅五月二十八日卒以宏治癸亥九月十七日子龍己丑進士前翰林侍講先公十年卒孫繼祖以公恩廢中書舍人子與公居鄰每挹公風度聆其言論未嘗不嘆服焉比聞公喪慨耆舊之不可復見而繼祖以遺命兄䟽奉狀請子銘是惡可辭銘曰赫赫英祖簡修進良燕翼厥謀

以詔憲皇翹翹尹公行譽言揚紛舍獻替銀堂出納  
聲名焱馳意氣山拔亨衢在前靡適非達天曹殺我  
公實任之端居廟堂進退百司絜短較長左右具宜  
俞受敷施惟帝所用手操權衡與世輕重北馬羣顧  
南金品貢二十四年既久且專乎所植樹其高蔽天  
棟梁楠檿百材萃焉盛名濼居造物所忌城門魚殃  
崑岡玉碎少行老歸綽有餘地人才實難矧惟老成  
曰篤不忘天王聖明爵以酬勞諡亦稱情天之定矣  
人之勝矣君子有性不謂命矣九原有知公可瞑矣

懷麓  
堂集

按岳通志是墓李東陽撰碑以墓誌為碑訛舊志  
又載劉健神道碑文以與墓誌多同故不載

張宏誼過尹公墓詩蒼蒼松柏林杳靄含烟霧石羊  
卧衰草翁仲寂相顧吁嘆公生平謗言時可懼如何  
多正士弔挽留哀慕峴碑如林立一一字俱綠竊思  
君子澤自應綿世祚歸樵指山村苗裔數家住耕鑿  
食先德頗能驚霜露因思前代風標榜成堂錮所遇  
非所忻羣起相詆忤明德翳幽潛青史何曾注徘徊

生感嘆不覺山光暮

素齋  
偶吟

史蘭墓在四里山西

舊志

劉嶽墓在城西十里

陸通志

張鶴墓在城西南五里

按舊志在紫青山南在城西南五里者為祖墓也  
王勅墓在縣西南十八里龍窩山之陰

邊貢墓在城東南萊家莊後

以上俱陸通志

李廷相資政大夫尚書邊公神道碑皇明有文學政事之君子曰邊公公諱貢字庭實別號華泉其先淮陰人也六世祖朝用元至正兵亂避地歷城華不注峯之陽因冒王姓故今為歷城人朝用生一誠高皇帝定天下始復邊姓一誠生文質以公大父貴贈奉

政大夫應天府治中文質生寧即治中公寧生節山  
西代州知州皆以公貴累贈資政大夫南京戶部尚  
書公生有異質即襁褓時祖母王夫人時置膝上口  
授章句一過輒成誦既乃從大父治中公於官所於  
是公角尚少即蔚有文名宏治乙卯年方二十舉山  
東鄉試第四人明年丙寅登進士第授太常博士時  
敬皇帝重祠事公駿奔惟謹嘗以告不與上私語左  
右曰何不見年少官人耶其為上簡注如此乙丑六  
月擢兵科給事中公性峻直又練習國章通曉時務  
抵掌談天下事雖重忤時貴弗畏避敬皇帝登遐公

劾太監張諭與太醫劉泰高廷和用藥之誤又劾太監苗遠與保國公朱暉都御史史琳用兵之火詞義剴切聞者凜然是年九月仍擢公太常寺丞既而還瑾擅權凌轢衣冠無所不至公又不能善事顯貴人於是顯貴人伺瑾顏色出公為衛輝知府庚午改荊州時監鄢寇亟飛輓之務公以身任之民不擾而事集克獲之功公與有勞若夫革吏姦察民隱修廢墜宣恩惠為天下治行最辛未擢山西提學副使尋丁父代州公憂甲戌服除起公河南公正已以格物先行而後文中條教以定其趨勤考較以程其業復文

體以示其標嚴勸懲以鼓其氣由是士經公訓迪者莫不充然各有所得丙子鄉試號稱得人丁丑丁母董夫人憂初公體豐顏渥風神藻雅兩更三年喪哀毀踰禮自是積衰成疾而公亦倦於遊矣辛巳今上入繼大統詔求遺逸撫按諸公交章論薦乃即家起公為南京太常少卿嘉靖癸未晉南京太僕卿承平日久騎政漸廢公至未期釐弊課功公私稱善甲申改南京太常卿丁亥再改太常卿提督夷館時四夷文字體各地殊八館諸生學無師授公徵求故譯是正諸文以成一家之學以通遠人之情戊子以年勞

轉南京刑部右侍郎己丑擢南京戶部尚書東南財賦半輸留都百官六軍咸仰給焉制以都御史總之轉相疑忌事多格闕公曰會計者部之事也覺察者院之事也何妨焉公之識大體事多類此辛卯忽以疾懇疏乞歸初公癖於求書所蓄不啻數萬卷壬辰偶遭回祿焚之幾盡公仰天大哭曰嗟乎甚於喪我也疾遂篤胡夫人謂公曰即不諱麗牲之石誰當銘公者既而曰宜莫如廷相公然之已而卒惟公與先太保公同省又同舉進士甚相愛也廷相叨官詞林兩佐南銓又辱公忘年之雅日夕以文事相劇切有



師資之益焉則茲役也其奚敢辭追憶國朝文章無慮三變高皇帝初正大統青田金華義烏諸君子力以斯文為己任剗削舊習橫制頽波幅尺騷雅興起學士永樂以後騷卿藻士布滿天下然辭頗纖弱稍異曩昔識者病焉敬皇帝時明興百三十餘年於茲矣四海梁肉百官委蛇得以肆力宏學留心藝苑於是公起歷下與北地李夢陽河南何景明互相師友力追古作妙悟正機鼓吹盛美可不謂振世雄豪也耶况公孝友天至又喜賓客樂道人善援引後進嘗若不及至於當官蒞法必盡其力所在人皆嚮之愛

之語曰文質彬彬然後君子其在斯乎其在斯乎公  
生於成化丙申八月卒於嘉靖壬辰二月年五十有  
七配柴氏累贈夫人先公卒繼配胡氏累封夫人子  
男二人長翼以廕為太學生次習皆幼所著詩文四  
十餘卷藏於家門人輩相與謀梓之蓋世所必傳者  
也葬以卒之年某月日其墓在邑城東原祖塋之側  
銘曰皇皇大明文治誕興言言歷城積高氣靈郁郁  
先生應運而升達治之本立士之經搗采元黃流聲  
宇宙人謂公才公不自有以器以年容臺是授周旋  
祀事受知我后乃擢黃門侃侃正言縉紳相賀風采

凛然再進容丞厥城是專哲學梁豫教化攸宣惟帝  
女嘉首下徵詔敬歷兩都薦掌邦教方期柄用允升  
於道胡過其歸克遂高蹈我讀我書天胡災之斯文  
之喪不其在茲公命近止吁其可悲門人達者愛慕  
厥遺華峯之麓佳城鬱鬱奎壁之間文光上燭我銘

諸碑用昭世族公乎有知庶幾瞑目

舊志

田雯萊莊觀邊華泉墓碑詩溪風吹野棠亂落花如  
雪惆悵青林間淺山埋片碣晚天淨無雲萬峯一明

月

古雅  
堂集

張元華不注道中懷邊華泉先生詩

華泉在華不注  
下先生墓直其

南數里歷下稱詩宿尚書沈杜儔敦盤分北地宗派啟

東州墓道風烟斷華泉蘆荻秋遺文傳海岱永賴砥

橫流

綠筠軒集

徐暹墓在榆山有薛樟墓表

據

劉天民墓在五里溝

藉志

陳明墓在城東南六里

黃臣墓在縣西奎山之陽

按臣濟陽人

范瑟墓在紫青山南

殷衡墓在城東小莊

以上俱藉志

江濟墓

李攀龍江君墓誌銘予如錦葬君於杏園祖兆東南

五十步蓋用君所自卜兆云

滄溟集

李攀龍墓在柳溝

滄溟志

攀龍亡妻徐恭人狀葬郡城西北馬鞍山之東陽祖

兆南若干步

滄溟集

王世懋東游記萬歷丁丑秋閏八月王子朝於京師

歸竝故道返於閭井中間忽念故人李于鱗物化八

載難酒之酌弗躬失今不假傳一行病夫業且歸卧

轅不北矣恐遂為終身悔乃自奮曰即病必往于鱗

家壁下而齊河去歷四十里而近業欲拜于鱗墓不  
可令兩臺使者知乃計為羸服間行而先一力聞之  
于鱗子駒報曰先人墓在長清道中毋煩間行也余  
益喜過望遂發齊河稍折而東幾迷失道會候者至  
云墓近矣請小憩民家以待駒駒至即與偕行墓所  
僅一尺土邱中耳無周垣封樹非得駒不能識也問  
之云將卜遷別葬耳佇立淒然具酒般設拜焚所為  
文及詩兩泣而別日暘抵長清

直志陸  
岱史

施閏章李滄溟先生墓碑嗚呼有明三百年著作家  
衆矣獻吉仲默已還稱元美于鱗天下無異詞元美

虎視四海獨並推歷下曰漢朝兩司馬吾代一攀龍  
蓋欲然以身下之迄於今家有其書人耳其姓字傳  
誦其流風遺韻不衰余視學濟南問其里因弔其墓  
而子孫微甚無能言者詢得之鄉先生郝給練遂偕  
藩使陳君兵憲陸君竝轡往墓在城西五里許皆下  
馬拜蓋藥山之麓也不封不樹余低徊久之相顧嘆  
息于鱗平生負才簡伉屏居鮑山當道冠蓋相屬至  
屏輿從候門卧不起今未及百年荒草孤墳樵采莫  
禁牛羊踰躅其上斯雍門所為哀吟孟嘗所為泣下  
也況於泯滅無聞之人乎墓側有豐碑仆地無字陳

君顧余曰嘻久矣其待君也余謝不敏乃碑而表之  
曰先生諱攀龍字于鱗號滄溟登嘉靖甲辰進士官  
刑部出守順德論最擢關中學使者以不肯奉台檄  
為文自免歸再起至河南按察使卒年五十七其政  
蹟詳殷正甫誌銘王元美傳中不具論論其著者于  
鱗生平非先秦兩漢書不讀非王吳殷許宗徐輩不  
交驪其為詩環視諸公非盡出已下則不出考之詞  
賦之科可謂嚶嚶道古進取之狂士也其詩七言近  
體高華典麗有裁眉天半之目拔其尤者千人皆廢  
樂府五言古摹漢魏古文詞摹左國先秦高自稱引



及元美所標榜頗失之太過要之非近代小家所能  
措手夫文章之道有利有鈍小則霸大則王于鱗岷  
起滄海雄長泗上諸姬主盟中夏燕秦吳楚之人翕  
然宗之如黃河泰岱又如太原公子望之有王氣斯  
固萬夫之雄也後之學者聞于鱗之風皆據碑高步  
追踪古作者于鱗其有起衰之功矣余將求其子孫  
新其白雪樓為于鱗別館而先之以其墓嗟乎于鱗  
之文不待余言而定者也若其壙墓不治碑版無傳  
則後起者之責也於是乎書順治十五年戊戌十月

立

碑

劉鎮重修李滄溟先生墓碑記前明中葉以名臣而負名譽者濟南有二人焉一為華泉邊尚書一為滄溟李先生也先生諱攀龍字子鱗登嘉靖甲辰進士由曹郎歷郡守提學累官河南按察使以詩文名嘉隆間為同時七子冠海內稱為滄溟先生既卒葬柳溝先塋上為先生祖父稍右先生之子駒耐焉距今蓋百餘年所矣而墓亦時圯順治間宣城施學使閔章嘗修之今又五十餘年曩所脩者復壞蓋先生之後人微矣過者知為先生四世衣冠所託而荒塚纍纍漸就湮沒良可慨也嘗按有明享國凡二百七十

餘年德業事功名臣輩出而文章之道則前莫盛於  
宏正後莫盛於嘉隆蓋此六七十年非獨時屬承平  
風氣完厚凡詩若文率為運會之所轉移而不覺亦  
有大力者起而指拄其間倡明作述而彼此交相應  
和遂得獨鳴其盛於一時後即有挾私心創異論欲  
力排而才之卒不能也蓋初之盛也有北地信陽一  
洗洪永以來纖弱卑靡之陋而身贊其功者邊尚書  
也後之盛也有太倉諸人一泯何李以後紛爭鑿柙  
之嫌而倡為之首者則先生也先生與尚書州里既  
同名譽相埒享年則俱不逾中壽有子則皆克紹家

聲而一再傳以後後起式微亦約畧相等豈名盛者  
食報不豐而君子之澤亦有時而斬耶不然何生既  
同方而後先之事又何適相符也唐時李翰林墓采  
石柱負外墓宋陽其後一徙青山一徙偃師旅殯之  
所既移矣而千百世以下過其地者方且為之憑弔  
徘徊而不能去蓋其流風餘韻猶足以感人也惟韓  
吏部亦有言李杜文章光燄萬文羣兒不自量而用  
謗傷則亦蚍蜉之撼而已先生以詩文鳴當世亦若  
唐之李杜而末世或有議之者則又何哉余既為先  
生脩飭墓道而更著論之如此康熙五十五年歲次

丙申孟夏月吉日立石

碑

田雯柳溝拜李滄溟墓詩下馬拜滄溟荒山亂石橫  
炎天無白雪遠樹有泉聲邊許才相映鵲華峯正晴

弁州今已矣誰重濟南生

古歌  
堂集

張篤慶樂山麓望滄溟先生墓詩公歸神兮山之阿  
水蜿蜒兮山嵯峨陽春絕調發浩歌大雅潤被何其  
多公安排訾彼則那竟陵之吠奈公何嘉隆正音琴  
瑟和寂寂秋原埋玉珂我來憑弔常陂陀豐碑何處  
迷寒莎嗚嗚山鬼吟女蘿未得挂劍深摩挲吁嗟乎  
山有岱兮水有海滄溟遺響依然在我歌九辨一招

魂樓頭白雪流光彩

崑崙山房集

按于鱗自作徐恭人狀云葬於馬鞍山之東陽舊志云攀龍墓在柳溝正馬鞍山下也殷正甫墓誌乃云葬於牛山王敬美記又云在長清道中則與狀及舊志皆不合敬美又云將卜遷別葬或者始葬牛山後仍遷馬鞍山耶今馬鞍山墓前翁仲華表與明制按察使品級相符而坊額但題李氏先塋疑于鱗葬母時所立者于鱗葬此實無所據或施愚山同郝焜訪聞得之誤以于鱗先人墓為其墓耳然敬美所謂在長清道中無周垣封樹者竟

不可考惜哉

許邦才墓在火閭

舊志

王莘山行過許長史殿卿墓下詩亂峯高下東川路  
一水浴回到墓門我倚夕陽呼長史烏啼殘雪憶梁  
園中原紫氣銷沉盡半碣春燕姓氏昏可惜鵲山村

裏句無人托契與重論

二十四泉草堂集

周繼墓在茂陵山

舊志

趙世卿墓在荆山前

劉伯縉墓在死兒嶺

王見賓墓在武場東

陳九疇墓在六里山

劉勅墓在華山下

盧義娥墓在城西五里鋪官廳側

以上俱  
舊志

張鶴鳴義娥傳畧義娥名桂香義者觀風者奇其死  
以意諡之也蓋郡諸生吳愛眾養女云娥生流儻比  
歲凶密於愛眾甫十齡婉靜不嬉先是愛眾母盧有  
侄三才家替無依依姑餬口愛眾乃直僕御之願指  
畧忤輒展足瞋詈曰奴奴侵牟我鉢奴胡為亦嘗加  
榜掠一日愛眾與妻李對案哺食三才負米入愛眾  
嫌之曰捐好銀錢為擇白粲米如此為尅正矣三才



透擊腰間匕首數之曰併死可在今日刺之不中愛  
衆繞磨旋娥大叫以槌以槌槌縈磨索中愛衆素病  
瘵不能支三才以積憤竟若然中飲刀飛血妻李累  
息奔踰西壞垣賊舍愛衆逐李愛衆尚強起護李撞  
壁僵掌血印壁痕殷數日李高隣媪門隣媪祈賊曰  
我無讎君願君舍我賊舍之復向壁間斫愛衆死娥  
持賊裾大呼邏者曰奴殺人奴殺人賊斫其頭骨併  
腦血交淋淋下娥持裾如故賊惶急維曳至衢娥呼  
擒賊不休賊愈狠斫其指乃去娥竟死衢中大驚一  
市人邏者糾衆兵尾之至灤源里東將入門守城者

擊以父遂擒之愛衆有柳女男女奴抱之亦甫八歲  
難促不能避履出户下賊督未之見命也而李氏妻  
者已別嫁爲他人新婦矣張鶴鳴曰城翼主持賊腦  
淋不舍予深取其不憚天性勇也緹縈之智出之緩  
城之勇出之急獨妻者忍忘壁掌血跡如新且觀見  
城之慷慨忽而覲顏他室彼摩笄青陵夫非人女子

哉

見稽志

張季彥義城墓詩我識吳生面忽聞吳生死其奈刺  
客坐中起萬夫膽慄神披靡吁嗟當日之義城獨奮  
臂而前訶攬賊之衣袖冒賊之匕首賊能念皇四顧

走十齡女三尺鐵龍泉怒吼白日昏蛾眉頰滅青鋒  
血國十橋邊恨未申易水蕭蕭空入秦區區睚眦何  
足數何如總角之女能報主

小兒集

國朝

懷晉墓在鑛村東

採訪

鍾性樸墓在華不注山南

同上

安致遠詩自返潯陽江上船買山竟築濟南阡高人  
在昔多僑寓才子從來妬大年明鏡清流思謝傅林  
風海水失成連帷紗幾許傳經士不及侯施負土賢

鍾憲副  
公家傳

孫建宗墓在縣東北五十里

岳通志

孫光祀墓在茂陵山東

林訪

朱綱墓在祝店東

按綱宏祚子宏祚葬高唐岳通志乃云朱二錫墓在縣東二十里子綱墓附側誤

戴璠墓在雁翅山東

王革墓在四里山西北

陳有功墓在趵突泉西南二里壩北有日述行實刻於

神道碑陰

曾孝女墓在城東八里五鼎山北

以上俱并訪

力力馬三  
陵墓  
三

沈廷芳曾孝女哀辭畧孝女棺歸歷下桑毀甫山長  
為之傳予重其行乃為文以哀之其辭曰嗟歎孝女  
稟至性些少無陝愉克身靖些德茂此儔家相慶些  
遠隨之官阿嬾病些容侍晨昏心恹恹些昊天不弔  
忽降大憂些中宵赤烏飛入慙慙些呼天莫聞身委  
鬱攸些血凝母體抱之入幽些嗟歎孝女誰則無死  
些似女之死古今有幾些若稽前聞倭三四指些曹  
抱父尸倒流江水些王抱母柩滅焰尺咫些王孝女  
遭焚地  
母棺流泣而火  
熄見南雷文定曾也殉之焚身牀第些姚江柳江孝  
水瀟瀟些有祠歸然終古不圯些佇請彤廷旌宅里

些坐山並峙鬱新阡些石表栽栽拂雲天些觀風於  
東欽淑媛些嗟歎孝女神孔安些

隱社  
齋集

歷城縣志卷第十七終